

Apokalipisi

Ongú inde u ambamba ta e

Eli na kalanu

Djaa aye bhuku na Apokalipisi inde-e bhú nedhinga u adu ato mbolo li omakilisito lie kabula nabhuka bhú Yesu Kilisito maka Ngámá gba o. Engú na ngbéngbé inde bhú bhuku inde-e, Djaa ngapa pi okpála inde ngatatanga me u du ne nabhuka di ne masi. Djaa atsia aha líli pi uo me, u lu kpékpéke bhú 'ngú na kukulu nedhinga na likabhu di ne bhú onedhinga u ngato mbolo li uo lie-o.

Bhú bhuku inde-e, u aye bhúbhú ongú bhelé pindji nambamba ta ongú, di ne pindji nau ongú maka loto li da e nde kpékpéke ngú nambimbila. Engú na ngbéngbé bhúbhú-o mbámá. A ko ongú inde me: li pápá gba Kilisito Ngámá gba ní-e, a li soso-o, Ebhe ahá angu obhulu yala gba e hana, ani há di angu Satana . Ani há di makalá pi okpála na ngbingbili gba e, ne bisagu na abhúlá na mbia di ne doto na mbia inde ani ako angu e pí ndu 'ngú lie hana-o.

Ongbengbe ongú inde bhú bhuku inde-e ngaie inde:

Eli na kalanu 1:1-20

Balu pi oDadjua mananika gba Ebhe 2 - 3

Malika 4:1 - 8:5

Ototi mananika 8:6 - 11:19

Nau ongú mananika maka loto 12:1 - 15:8

Okópo mananika na ke 'ngú gba Ebhe 16:1-21

Ongú mananika u apa e pindji babilona 17:1 - 19:10

Nabu ta 'ngú pindji nau ongú mananika maka loto 19:11 - 21:8

Yelusalema na mbia, ele gba Ndili Kandole 21:9 - 22:21

Lita 'ngú-o

¹ Bhuku inde-e ngakpokpo 'ngú pindji engú inde li Ebhe ambamba ta e pi Yesu Kilisito-o . Ebhe ambamba tata pi ani ngubula me ani suno pi obalise gba ni-o, engú inde améne lie mbia inde-o. Abhomu-o, Yesu Kilisito atsia atima andjelu gba e me ani mbamba ta engú ango-o pi bali gba ni Djaa . ² Djaa akpokpo ndu 'ngú inde ani au e hana. Ndu 'ngú inde ani au e hana-a, a ko 'li Ebhe, a ko la di kukulu 'ngú inde li Yesu Kilisito ambamba ta e pi ani-o. ³ A ko djali pi kpála inde ngatanga bhuku inde, ne obhende i ngadje ongú inde li Ebhe ambamba ta e bhúbhú-o, inde di ngakpata ongú inde aye lie bhú bhuku inde-o. Padhá de, anga nedhinga na ongú ango-o akolo masikpe.

Djaa yi okpála na oDadjua mananika gba Ebhe-e mayi

⁴⁻⁵ Ngama Djaa, ma atima balua inde-e bhú oDadjua mananika inde bhú ndu doto na Adjia-o.

A ayo me Ebhe inde uu inde adu nani uu, inde la di ngago-o, suno bádha bhú 'bu ne guo 'ngú gba e pi yi. A ayo di me obua mananika inde kala kiti na ngámá gba Ebhe-e, bhú dabili ne Yesu Kilisito suno bádha bhú 'bu ne guo 'ngú pi yi. Yesu Kilisito-o, a ko kpála inde akpokpo ngbili 'ngú . A ko di kpála na kalanu inde azuku bhú ká okpála inde amu, a ko la di ngámá gba ongbengbe ongámási na doto.

Kilisito ngakunda ní, ani atsia agbegbe ní bhú osisiti 'ngú gba ní-e ne ngute e. ⁶ Ani amene me ní kolo okpála na Nau gba Ebhe . Ani amene di me ní kolo odimandø ngubula namene kulu liní pi Ebhe, 'Dyi ni. A ayo me sangu di ne angu du pi ani duduma ne duduma! A adu moko.

⁷ Yi tsitsia, ani ngago bhú ndindi!

Ndu okpála hana aú ani,
belegu obhende adu nani kala ani ne mandambi-o.

Ndu opiga inde píla doto libhomu adú bhú
'gbá li 'ngú gba ani-o.

Heni, a adu moko!

⁸ Ebhe Ngámá Apí 'Kpí apa me: «Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.» Ebhe ne Kpála inde uu, Kpála inde adu nani uu, Kpála inde di ngago.

Djaa au Kilisito bhú 'he maka loto

⁹ Ngama Djaa, ma ne ndai yi inde ngakobho bhú dabili bini ne yi bhú likabhu, ne bhú Nau ne nazi kekele bhú nabhuka Yesu. Ngama-a, ma du nako bhú kpata bhú kpom̄o inde u a'i e me Patemosi kabula 'li Ebhe, la di anga ma ngakpokpo kukulu 'ngú inde li Yesu ambamba ta e-o. ¹⁰ Bhú 'kpí gba Ngámá-a, Bu Bhobua abedhe ma, ma atsia adje ne akele ma kpéke eli bini maka mbala. ¹¹ Eli ango-o apa me: «Ehe inde mu ngau e-e, ye bhú bhuku bini, amba mu tima bhú oDadjua mananika gba Ebhe inde bhú Efeso, bhú Similine, bhú Pelegame, bhú Tiatile, bhú Salade, bhú Filadelefi ne bhú Laodisé.»

¹² Abhomu-o, ma adji lima ngú natsia kpála inde adu nagama 'ngú mu-ma-o. Ma adji lima lie, ma au otala na olo mananika. ¹³ Bhú ka otala ango-o, ehe bini adu maka kpála-kuti. Ani adyi 'ndjá bongo akolo bhú 'dhu e, ani atsia agbite mbulu e ne mukabha inde u amene e li olo.† ¹⁴ 'Ndi ani ne sundjo ani avu má tuu, maka kato! Djila ani adu nade maka zi djua. ¹⁵ 'Dhu ani adu nasu maka kalase na kpéke mase inde u ato e bhú djua, zizi atsia aholo nasu. 'Li ani adu maka tolo wowo 'ngu. ¹⁶ Ani aholo

† 1:13 1:13 Tsia bhú Dan. 7:13.

ikupala mananika ne 'kpa e na kokpa. A adu akoto bhú 'bhø aní ne mbotia inde adhe ne ndu pasu bhisi hana. Bhúla aní adu asu maka kpéke zindjila na tulukpe.

¹⁷ Ma au aní lie, ma atí bhú li 'dhu aní maka kpála inde akpi. Pipita-a, aní a'o 'kpa e na kokpa-a pí ma, aní atsia apa mu ma me: «Mo okpé-e de! Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. ¹⁸ Ma la di bhú mukobho. Ma adu nako me ma nde akpi, la mbia inde-e, ma bhú mukobho na duduma. Ma ne angu pí 'ndji kuo di ne pí 'ndji bili gba okpála inde amu. ¹⁹ Kaka-a, ye ongú inde mo ou e inde. A ko ongú inde ngakodho 'kpí, di ne ongú inde a ayo me ago pipita ko. ²⁰ Pindji oikupala mananika inde mo ou e sa 'kpa ma na kokpa, di ne otala mananika na olo-o, gbo nga 'dje mu, ma mbamba kukulu tata-a pí mu. Mbila me, oikupala mananika-a, a ko oandjelu na oDadjua mananika gba Ebhe, otala mananika-a, a ko oDadjua mananika gba Ebhe-o.»

2

Balua pi okpála na Dadjua na Efeso

¹ Kpála inde ma au e apa matá mu ma me: «Ye balua pi andjelu na Dadjua na kuti na Efeso me:

«Kpála inde aholo oikupala mananika sa 'kpa e na kokpa, inde ngadholo bhú ká otala mananika na olo-o apa me: ² Ma mbila okulu gba mu-o hana. Ma mbila hana me mo omene kulu kpekpeke, me mu di ne bua na kekele. Ma mbila hana me mu tí da naziba osisiti okpála de. Ma mbila hana me mo ole okpála inde ngapa me o ne obhulu titima gba ma-a me u nde la mo-o ade-e, mo atsia au me a ko obhulu eu. ³ Ma mbila hana me

a bhú m̄ ne kekele, mo osia likabhu ngubula 'li ma, m̄ tsia ndala de.

⁴ La-a, siti 'ngú inde ma au e li pabili gba m̄-o, a ko me mo o'lo ká mukunda inde mo okunda nani ma ne e a'o. ⁵ Kaka-a, bhundja nga bili inde mo oti li e-o. Dji bua m̄, amba m̄ mene okulu maka mo od̄ nako namemene lie kalan̄ ko. † d̄ mo-o de-e, ma agó li pabili gba m̄, ma a'é tala gba m̄ li bili i nde li e-o, i d̄ me m̄ nde dji bua m̄ de ko. ⁶ Engú bini, bádha 'ngú inde bhú m̄-o ngae inde: m̄ ngayala okulu inde li oNikolaite ngasuno e, maka ngama makpe di-e, ma ngayayala lie-o.

⁷ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhom̄-o, ma ahá lí ndula na mukobho inde bhú edyi gba Ebhe-e pi ani me ani d̄ nazuz̄. Edyi ango-o bhú kuti na m̄ndeyi gba Ebhe-o.»

Balua pi okpála na Dadjua na Similine

⁸ Kpála inde ma au e apa matá m̄ma me: «Ye balua pi andjelu na Dadjua na Similine me:

«Kpála inde akpo lita nd̄ 'ngú hana, inde di abú ta nd̄ ongú hana, Kpála inde akpi nani, engú bini atsia azuku-o apa me: ⁹ Ma mbila likabhu gba m̄ di ne ndibhili gba m̄-o hana, engú bini, kukulu tia mangbo ngae inde ka m̄-o. Ma mbila la di maka li okpála inde ngapa me o ne omaYuda me u nde ne omaYuda ade-e, ngadi m̄ lie hana. La ngauo-o, a ko omaYuda de, a ko okpála gba Satana ! ¹⁰ Mo odjé tsulu ka likabhu inde mo osia e de. Djedje nga, djabulu andi okpála bini bini bhú ká yi bhú tikpu ngú nale yi. U ató mbolo li yi ngubula ekpi ndjikpa. Mo oyála ma de,

abana i yo bha me u bhøø mɯ. Pipita-a, ma ahá ndata na 'ngbø ndua pi mɯ maka makalá gba mɯ-o. Ndata na 'ngbø ndua ango-o, a ko mukobho na duduuma.

¹¹ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomɯ-o, ani sía likabhu gba nakpi na bhisi-e belegu de bini.»

Baluu pi okpála na Dadjua na Pelegame

¹² Kpála inde ma au e apa matá muuma me: «Ye baluu pi andjelu na Dadjua na Pelegame me:

«Kpála inde ka e ne mbotia inde ngadhe ne ndu pasu bhisi hana-a, apa me: ¹³ Ma mbila bili inde mu ngadu li e hana, bili ango-o, Satana ne ngámá oo ngae. Mu ngalila 'li ma. Mu ndala 'kpa li nabhuka gba mu bhú ma-a de, abana bha li nedhinga u abhøø Atipasi lie agba yi, li bili li Satana ngadu li e-o. Atipasi adu nani nakpokpo 'ngú gba ma mbámbá kala okpála.

¹⁴ La-a, siti 'ngú inde ma au e li pabili gba mɯ-o, a ko me, a agba mɯ ne okpála koko inde ngadhede li 'ngú li Balama adu nani nasuno e pi Balaka-o. Balama adu nani nasuno pi Balaka me ani to omatsalaele bhú siti 'ngú. Ani adu apite uo me u zu oenu inde u aha o pi oebhe na eu, amba u du di nakunda olisi, i du di-e obhosi ngangá. ¹⁵ A bhadi moko, a di bhú ká okpála gba mɯ-o ne obhende adhedhe li nasuno siti líli maka oNikolaite ngasusuno lie-o. ¹⁶ Kaka-a, dji bua mɯ. Padhá de, anga i du mo-o de-e, ma ngago agba mɯ má gala, ma tsia gú okpála ango-o ne mbotia inde ngakoto bhú 'bhø ma-o.

¹⁷ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!

Kpála inde agbóko 'gú bhomu-o, ma ahá mana inde awo lie mawo-o pí aní. Ma ahá la di línga pí aní. U aye pí línga ango-o 'ilí na mbia inde lí kpála bini mbíla ta e de, bha bini kpála inde asia línga ango-o ko!»

Balua pí okpála na Dadjua na Tiatile

¹⁸ Kpála inde ma au e apa matá muuma me: «Ye balua pí andjelu na Dadjua na Tiatile me:

«Ndíli gba Ebhe inde lí Djila e ngade maka djua, lí zì 'dhu e nde ngasu maka kalase na kpéke mase, apa me: ¹⁹ Ma mbíla okulu gba mu-o hana. Ma mbíla mukunda gba mu-o hana. Ma mbíla nabhuka gba mu-o hana. Ma mbíla kulu mo omemene e pí okpála di ne kekele gba mu-o hana. Ma mbíla hana me kulu mu ngamene e mbia inde-e ane bhe na kalanu-o ne bhelé. ²⁰ La-a, siti 'ngú inde ma au e lí pabíli gba mu-o, a ko me, mu ngazíba Djedjabele, 00 inde ngapa me ní ne polofeta gba Ebhe-o. Aní ngapite obalise gba ma-a ne nasuno pí uo engú na zabhe, di ne nazu onu inde u aha o pí oebhe na eu-o. ²¹ Ma a'o nako nedhínga pí aní me aní dji bua e. Engú bini, aní kunda nadji bua e de me ní 'o nakunda obhosi ngangá ma'o-o de.

²² Kaka-a, ma agú 'i aní pí polo na 'ngbé líkabhu bhú dabilí bini ne obhende ngakunda obhosi, i du di-e olisi gba okpála koko bhú dabilí bini ne aní-o, i du me okpála ango-o nde dji 'ngbu o lí sisiti kulu gba aní de-o. ²³ Ma abhíli okpála inde ngakpata nganda aní-o, lí ndu okpála na oDadjua gba Ebhe-e hana mbíla me ma ne kpála inde i ngambíla mabhundja di ne gumu gba okpála hana. Ma ahá pí kpála ne kpála bhú ká yi makalá nakpata bha lele siti 'ngú inde aní amene e ko. ²⁴ La ngayi okpála na Dadjua na Tiatile, inde i dhedhe lí nasuno na sisiti bhomu-o de-e, inde i kpata di engú

li okpála bhomu-o nga'li e me, “Engú nawo mawo gba Satana” de-e, ma ne líli koko na'o'lo pí yi ade. ²⁵ Engú bini, yi dhedhe bha li engú inde ka yi akólo bha bini li 'kpí inde ma agó lie ko.

²⁶⁻²⁸ Kpála inde agbóko 'gú bhomu-o, inde alíla okulu gba ma nakolo alí soso-o, ma ahá pí aní angu inde ma asia e ngama makpe ka 'Dyi ma-o. Ma a'ó aní ngámá pí 'ndji opiga. Aní aú ngámá pí 'ndji uo. Aní ahólo kalase sa 'kpa e, aní tsia dú agugumu uo maka u agugumu omadakpa lie ko.† Ma ahá di ikupala inde asusu kəkpí-e pí kpála ango-o ngú nasuno me aní agboko 'gú-o agboko.

²⁹ A ayo me kpála inde li e ne djedje-e, dje engú inde li Bu Bhobua ngapa e pí oDadjua gba Ebhe kol!»

3

Balua pí okpála na Dadjua na Salade

¹ Kpála inde ma au e apa matá mu ma me: «Ye balu a pí andjelu na Dadjua na Salade me:

«Kpála inde li obua mananika gba Ebhe, di ne oikupala mananika nde ka e apa me: Ma mbila okulu gba mu-o hana. Okpála ngapa me mu uu, engú bini, mo okpi. ² Zuzuku, mene ne kpéke me mo obulu bha má pii de! Padhá de, anga ma au me kulu gba mu-o kolo nga li lelele de. ³ Kaka-a, bhundja nasuno inde mo osia nani e-o ne lele maka mo odje nani lie-o. Dji bua mu, amba mu lila nasuno ango-o malila! I du la me mu nde zuku de-e, ma gó maka bhulu 'zi, ma kóto li mu bhú gbilikiti, me mu nde mbila nedhinga ango-o de.

⁴ Engú bini, a bhú ka yi okpála na Salade ne okpála bini bini inde i siti obongo gba o-o de. U adyí obongo

† 2:26-28 2:26-28 Tsia bhú Ets. 2:8-9.

na bububu, ngaya ne uo-o, ya tsia dhólo bhú dabili bini. Padhá de, anga u atí ne nadhuku ne ma bhú dabili bini ngao. ⁵ A moko, kpála inde agbóko 'gú bhomu-o, adyí obubu bongo. Ma búlu 'li ani bhú bhuku na mukobho-o de. La di-e, ma azíba kala 'Dyi ma, di ne kala oandjelu gba ani-e me, a ko kpála ka ma.

⁶ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe ko!»

*Balu*a pi okpála na Dadjua na Filadelefi

⁷ Kpála inde ma au e apa matá mu ma me: «Ye balu a pi andjelu na Dadjua na Filadelefi me:

«Kpála inde bubu, inde i papa eu de, inde li fungula gba Davidi nde ka e-e, inde i 'u bhoti-e, kpála bini ti da nanini de, inde i ni la di bhoti-e, kpála bini ti da na'u'u de-e, apa me: ⁸ Ma mbila okulu gba mu-o hana. Ma mbila hana me mu kpékpéke ade. La-a, mo olila 'li ma ndjindji. Mo opa mbámbá me mu ne kpála ka ma. Kaka-a, ma a'u bhoti kala mu, bhoti ango-o, kpála bini ti da nanini de. ⁹ Tsia nga engú inde ma améne e li okpála gba Satana, obhulu eu inde ngapa me o ne omaYuda me a nde omaYuda ade-o: ma agbéle uo kala mu, u tutu lipuku o kuto kala mu ngu nadhogu mu, amba u mbila me ma ngakunda mu. ¹⁰ Mo olila líli gba ma pindji naholo bua o ndjindji. Kaka-a, ngama di-e, ma alíla bhadi mu moko li nedhinga na kpéke da 'ngú inde agó pála doto libhomu ngu nale okpála na doto ko. ¹¹ Ma agó mbia! Dhedhe li nasuno inde mo odje e ndjindji, ngubula me kpála bini adhépe ndata na 'ngbø ndua gba mu-o de.

¹² Kpála inde agbóko 'gú bhomu-o, ma a'ó ani maka nepanda bhú 'ngbé 'ti Ebhe gba Ebhe gba ma-o. Ehe bini ti da nagbe matá ani oo belegu de bini. Ma ayé 'li

Ebhe gba ma-a li kute ani, bhú dabili bini ne 'li gudhu gba Ebhe gba ma-o. Gudhu ango-o, a ko Yelusalema na mbia inde ayie abhúla, inde li Ebhe atíma galikpe e-o. La di-e, ma ayé 'ili gba ma na mbia li kute ani.

¹³ A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe kol!»

Balu pi okpála na Dadjua na Laodisé

¹⁴ Kpála inde ma au e bhomu-o atsia apa mu ma li soso me: «Ye balu pi andjelu na Dadjua na Laodisé-e me:

«Kpála inde 'li e me “A du moko”, kukulu kpála inde ngakpokpo 'ngú me ani nde 'o koko pépé de-e, inde lita ndu 'he li Ebhe abho e hana-a apa me: ¹⁵ Ma mbila okulu gba mu-o hana. Mu kpikpina ade, mu di kpákpá ade. A ayo igini me mu de adu kpikpina, i du mo-o de-e, mu du kpákpá. ¹⁶ I nde lie me mu nde yapayapa-a, mu nde kpikpina adi-e, mu la di kpákpá adi-e, ma azie mu mazie!

¹⁷ Mu ngapa me: “Ma ne bhulu tia, ma asia tia bhelé, ma ne gumu 'he belegu ade bini.” Engú la bini, mu mbila de me ni bhú likabhu-o de. Mu mbila de me ni nga'o li ma ndjinga-a de. Mu mbila de me ni ne bhulu ndibhili-e de. Mu mbila de me ni u 'kpí de-e de. Mu mbila la di de me ni ndumbu-o de. ¹⁸ Kaka-a, ma ngayo ka mu me, a ayo nakala olo inde li djua aleke e ndjindji-e ka ma, ngubula me mu kolo bhulu tia. Ma ngayo ka mu me, a ayo nakala di obongo na bububu ka ma ngú nadyidyí li kute mu, amba numu améne mu ka ndumbu gba mu-o de. Ma ngayo ka mu me, a ayo nakala la di elá ngú nasese bhú djila mu, amba mu du au 'kpí ndjindji.

¹⁹ La pi ma-a, ndu okpála inde ma akukunda o hana, ma ngambe bhú 'ndji uo, ma di ngasuno oehe inde u

mene e ndjindji de-e pi uo. Kaka-a, a ayo me mu dji bua mu, amba mu du kpákpá. ²⁰ Djedje nga, ma alu li 'bhø bhoti-o, ma ngabhíbhí. Li kpála dje 'li ma, ani 'u 'bhø bhoti-e, ma lí agba ani, li ngaya ne ani-e, ya tsia zú 'he ne ani bhú dabilí bini.

²¹ Kpála inde agbóko 'gú bhomu-o, ma azíba pi ani nadu bhú dabilí bini ne ma pí kiti na ngámá gba ma maka ngama di ma agboko 'gú lie, ma atsia adu bhú dabilí bini ne 'Dyi ma pí kiti gba e na ngámá ko.

²² A ayo me kpála inde li e ne djedje-e, dje engú inde li Bu Bhobua ngapa e pi oDadjua gba Ebhe kol!»

4

*Abhú*lá-a, ndu okpála hana ngadhøgø Ebhe

¹ Pipíta-a, ma au engú koko bhú 'he maka loto. Ma au bhoti inde adu baba abhúlá.

Eli ma adje igini e kalanu mugito me u nga'u toti-e, apa muuma me: «'U ei, amba ma suno engú inde ngago sidi-e pi mu.»

² Kolo me-e, Bu Bhobua abedhe ma. Abhúlá oo, kiti bini na ngámá adu oo, kpála bini atsia adu pépé. ³ Zi kpála ango-o adu nasu maka oteme* na zizi. Makilima asa dengo kiti na ngámá inde ani adu pí e ne zi e ngbalina. Zizi adu di maka zi teme na zizi. ⁴ Okiti na ngámá ndjikpa bhisi ne ká badha asa dengo kiti na ngámá ango-o ngbalina. Obhelesi okpála ndjikpa bhisi ne ká badha atsia adulu pépé. U adyidyí obubu bongo , u atsia adyidyí ondata na ngámá inde u amene e li olo-o bhú 'ndji o. ⁵ Li bilí li kiti ango-o adu lie, ekpí adu andjendjengene, mugbalá adu asusula. O'i 'ke mananika inde adu atsi

* ^{4:3} ^{4:3} Oteme: Bhú eli na giliki-e, u aye limbi oteme bata: djasepe, saladuane ne emelode.

matsi adu kala kiti ango-o. O'i 'ke ango-o, a ko obua mananika gba Ebhe-o. ⁶ Kala kiti ango-o, ma au 'he bini maka 'ngbé 'ngu inde li píla e adu nasu má ngingingi maka bitolobi. A adu má ngilili maka teme† na zizi.

Lingo kiti na ngámá ango-o, okpála badha na ngangamba‡ adu oo. (A akunda napa me sunda kiti na ngámá di ne bili li obhelesi okpála ndjikpa bhisi ne ká badha adu lie-o.) Djidjila abedhe li bhúla uo di ne li 'ngbu uo bedhe. ⁷ Kpála bhe na bini-e, adu maka kingbi. Bhende na bhisi-e, adu maka folo bagala na bhobhoko. Bhende na bata-a, bhúla aní adu maka kpála-kuti. Bhende na badha-a atsia adu maka ndua inde bhú holo. ⁸ Ndu uo badha hana, u adu ne mbumbudha madhia madhia. Djidjila atsia abedhe tété bedhe bedhe, ali ngbungbu di ne asabusabu. U ngali 'tsi sukpe ne ngbikpi mandí nago me:

«Ebhe Ngámá Apí 'Kpí, Bubu, aní Bubu, aní Bubu.

A ko Kpála inde adu nani uu, inde uu, inde di ngagol!»

⁹ Ndu nedhinga hana li okpála badha bhomu-o ngali 'tsi ngú nadhogé kpála inde adu pí kiti na ngámá, kpála inde la di bhú mukobho duduma ne duduma, u ngaha sangu di ne nagie heni pi e lie, ¹⁰ obhelesi okpála ndjikpa bhisi ne ká badha-a ngatutu lipuku o kuto kala kpála ango-o. U ngadhogé kpála inde bhú mukobho duduma ne duduma-o. U ngapandja ndata na ngámá gba o-o, u ngabubu kala kiti na ngámá-a ne napa me:

¹¹ «Ebhe Ngámá gba ya, mo oti ne napa me okpála toko mu, u dhogé mu,

† 4:6 4:6 Teme: Bhú eli na giliki-e, u aye me «Teme na kilisitale.» ‡ 4:6 4:6 Okpála badha na ngangamba: Li bili inde-e, u mbila de me ne me a ko okpála-kuti, ne me a ko oandjelu-o de.

amba mu sia sangu kabula ngámá gba mu-o.
Padhá de, anga mo obho ndu 'he hana ngamu.

A atsia amene lie,
anga mo okunda nani me a amene lie moko.»

5

Ndili Kandole-o abhúlu 'kpá balua inde agagala lie magagala-o

¹ Pípita-a, ma au 'kpá balua bini sakpa kpála inde adu pí kiti na ngámá-o, ani aholo li pá 'kpa e na kokpa. U aye 'he pépé ne ndu pasu bhisi hana. U agagala, u atsia ayele ne malika li obili mananika. ² Abhomu-o, ma au andjelu bini na angu inde adu asusula me: «A ti da nasosoko malika li kute 'kpá balua inde-e ngu nabhubhulu-o da?» ³ Engu bini, kpála bini inde ati da nabhubhulu di ne natsia 'kpí bhúbhú-o du de, abana abhúlá, abana píla doto, abana asa doto. ⁴ Kaka-a, ma aku 'gbá naali, anga kpála inde ati da nabhubhulu di ne natsia 'kpí bhúbhú-o du de. ⁵ Engu bini, suka obhelesi okpála apa muuma me: «Mo okú 'gbá de. Tsitsia nga, kingbi na piga gba Yuda, ndili gba 'ngbé ngámá Davidi-e agboko egú-o agboko. Ani ti da nasosoko malika mananika bhomu-o, ani tsia bhulu di 'kpá balua ango-o.»

⁶ Abhomu-o, ma au Ndili Kandole bini alu tutu, li bili na kiti na ngámá-o. Okpála badha na ngangamba bhú dabili bini ne obhelesi okpála-a asa ani ngbalina. Ani adu mugito me u akodho ngulu ani makodho. A adu bhú 'ndji ani ne odidi mananika di ne djidjila mananika. Odjidjila mananika bhomu-o, a ko obua mananika gba Ebhe li ani atima o píla doto libhому-o. ⁷ Ndili Kandole-o ago, ani atsia aha 'kpá balua sakpa kpála inde adu pí kiti na ngámá-o. 'Kpá balua ango-o adu sakpa ani li pápá na kokpa. ⁸ Nedhinga ani aha 'kpá balua lie, okpála badha

na ngangamba di ne obhelesi okpála ndjikpa bhisi ne ká badha-a, atuko ne lipuku o kuto kala Ndili Kandole-o. A adu sakpa ndu uo bini ne bini hana ne dumu di ne kopo na olo inde abedhe ne bandele bedhe. Bandele ango-o, a ko mayo gba okpála gba Ebhe-o. ⁹ U adu nali etsi na mbia me:

«Mu ti da naha 'kpá balua-o
 ne nasosoko malika ango-o,
 anga u abhole nani mu,
 mo otsia agbegbe okpála inde adu bhú bali-e
 ne ngute mu pi Ebhe.
 A ko okpála na ndu bili hana,
 ne ndu opiga hana,
 ne ndu okongú hana.

¹⁰ Mo otsia amene me
 u kolo pi Ebhe gba ní-e okpála na kuti-ngámá gba
 ani,
 u kolo di odimandé pi ani,
 u tsia u píla doto.»

¹¹ Pipita-a, ma au, ma atsia adje 'li bhiti oandjelu. U adu nani okote ne kote. U alulu denko kiti na ngámá-o, ne denko okulu 'he badha-o, di ne denko obhelesi okpála-o.

¹² U adu asusula kpekpeke me:
 «Ndili Kandole nani inde u abhole e
 ati ne nasia sangu ,
 ani ati ne nasia tia, ne imbilangu, di ne ngámá.
 A ayo me okpála toko ani,
 u manga ani.

A ko kpála na angu.»

¹³ Ma atsia adje di ndu ohe na píla doto libhomu ne ohe na abhúlá ne obhe na sa doto, ne obhe na abhú 'ngu-o hana aholo nali etsi me:

«A ayo me duduma ne duduma ní toko,

ní dhøgø, amba ní ha di sangu ne ngámá pí kpála
inde
ngadu pí kiti na ngámá-a

bhú dabilí bini ne Ndili Kandøø-o.»

¹⁴ Okpála badha na ngangamba-a adu abhuka engú u adu
apa e bhomu-o me: «A adu moko!» Obhelesi okpála atsia
adu atutu lipuku-o kuto kala kiti na ngámá ne nadhøgø
Ebhe bhú dabilí bini ne Ndili Kandøø-o.

6

Ndili Kandøø-o aholo nasosoko omalika mananika li
kute 'kpá balua-o

¹ Abhomu-o, ma atsia 'kpí, ma au Ndili Kandøø-o
asoko suka omalika mananika li 'kpá balua-o. Aní asoko
lie, ma adje suka okpála badha na ngangamba-a ngagama
'ngú kpékpéke mugito me mугbálá ngasusula ngae. Aní
me: «Gogo!» ² Ma me ma tsia 'kpí me-e, ma au punda bini
na bubu akoto. A adu sakpa kpála inde adu pí aní-e ne
adili. U ato ndata na ngámá bhú 'ndji aní. Aní anu maka
kpála inde agboko 'gú ngú nagboko matá egú koko.

³ Nedhinga aní asoko malika na bhisi-e lie, ma adje kulu
'he na bhisi-e apa me: «Gogo!» ⁴ Abhomu-o, li punda koko
akoto lie-e, kute aní ambe maka djua. U aha pí kpála inde
adu pí aní-e angu na'e guo 'ngú píla doto ngubula me
okpála bhili lio. U atsia aha di pí aní mbotia na ndjándjá.

⁵ Li Ndili Kandøø-o asoko malika na bata lie, ma adje
kulu 'he na bata-a apa me: «Gogo!» Ma me ma tsia 'kpí
me-e, ma au punda na bibili. A adu sakpa kpála inde adu
pí aní-e ne kilo. ⁶ Ma adje 'he mugito me kpála agama
'ngú bhú ká okpála badha na ngangamba-a me: «Li kpála
mene kulu ekpí bini libhomu-o, aní de sia tia inde i tí da
nakala bha bini koli kilo na ngano bini, i du mo-o de-e, aní

de sia tia inde i ti da nakala bha bini koli kilo na olodje bata.* Engú bini, vino ne emu-o adúla lie de.»

⁷ Li Ndili Kandole-o asoko malika na badha-a lie, ma adje kulu 'he na badha-a apa me: «Gogo!» ⁸ Ma me ma tsia 'kpí me-e, ma au punda na 'ngu kpadhi. A adu 'li kpála inde adu pí ani-e me «kuo.» Bili gba okpála inde amu-o adu li 'ngbu ani. U aha nani angu pi uo ngubula nabhili té okpála na píla doto. I du me okpála nde badha-a, u bhóle kpála bini bhú ká uo. U abhili té okpála bhomu-o ne egú, ne gumu, ne okuo di ne onute.

⁹ Li Ndili Kandole-o asoko malika na bhuluvue lie, ma au bua okpála inde u abhili nani o sa misa natsulu entu pi Ebhe-o. U abhili nani okpála bhomu-o ka anga u abhuka 'li Ebhe, u atsia akpokpo di mbámá. ¹⁰ U adu asusula kpekpeke me: «Ngámá na bubu, mu ne kukulu ngámá ngamu. Mu ngadjeke ni ngu nakodho 'ngu sunda ya ne okpála na doto-o? Ngauo, u abhili nani ya. Kodho 'ngu bhomu-o kokodho, amba mu 'o 'ngu pí uo.» ¹¹ Abhomu-o, u aha pi ndu uo hana bini ne bini lobe na bubu. U atsia apa pi uo me: «Yi djeke nga mbo bedi, alo gba yi-e le nga de. A ne ondaise yi koko inde ngakpata nganda Ebhe. A ayo me okpála na doto bhili nga di uo maka u abhili nani yi lie ko. Pipita-a, u tsia kódho 'ngu gba yi ne uo bhú dabili bini.»

¹² Pipita-a, ma au Ndili Kandole-o asoko malika na madhia-o. Abhomu-o adjigidjo na ngbéngbé amene lie. Ela abili bhúla e má mbilili maka bongo na pili. Epe libhomu atsia andju má ngua maka ngute. ¹³ Oikupala ayie abhúlá, abala kuto maka lí 'lá bhe i mbe de-e ababala lie ka kpéke anvi-o. ¹⁴ Kokpí angita maka 'kpá balua

* ^{6:6} ^{6:6} Bili inde si-e akunda napa me adyindi adu naali. Mase ezu akpéke na kuo kuo.

inde u agagala e magagala. Ndu oeta hana ne okpome hana ayie bhú dá o. ¹⁵ Ongbengbe ongámási na doto, ne ongbengbe okpála, ne ongbengbe ongámási na sudha, ne obhulu tia, ne okpála na angu di ne ndu okpála koko hana, obalise ne okpála inde bhú bali ade, ndu uo hana awowo lio bhú ogudho teme ne bhú oeta. ¹⁶ U aholo apa pi oeta di ne pi ongbengbe teme me: «Yi bala pí ya, amba yi wo ya tsutsu. Yi wo ya me kpála inde adu pí kiti na ngámá-a aú ya de. Yi wo ya ka kpéke ke 'ngú gba Ndili Kandole-o. ¹⁷ Padhá de, anga 'ngbé 'kpí na ke 'ngú gba uo akolo. A ti da nalu kakala da?»

7

Okpála kutu kámá bini ne ndjikpa badha ne ká badha

¹ Pipita-a, ma au oandjelu badha, u nde alulu li odje doto badha hana. U adu ayoko me anvi bini apé pí doto, i du di-e pí 'ngbé 'ngu ne pí ondula de. ² Abhomu-o, ma au andjelu koko bini ayie ne andjongu. A adu sakpa ani ne kasé gba Ebhe na uu-o. Ani asula ne angu hana pi oandjelu badha inde li Ebhe aha nani angu nabhili doto pi o bhú dabili bini ne angu nasiti 'ngbé 'ngu-o pi o me: ³ «Yi abhili nga doto ne ondula padhá de. Yi asiti nga di 'ngbé 'ngu padhá de. Yi djeke nga me ya tu kasé pidi obalise gba Ebhe gba ní-e paká.»

⁴ Ma atsia adje alo gba okpála inde u atu kasé lio-o. A adu okpála kutu kámá bini ne ndjikpa badha ne ká badha bhú ndu opiga gba omatsalaele hana. ⁵ Bhú piga gba Yuda, okpála bhe u atu kasé lio-o adu okpála kutu ndjikpa ne ká bhisi. Bhú piga gba Lubeni-e, okpála adu kutu ndjikpa ne ká bhisi. Bhú piga gba Gada-a, okpála adu kutu ndjikpa ne ká bhisi. ⁶ Bhú piga gba Asela-a, okpála

adu kutu ndjikpa ne ká bhisi. Bhú piga gba Nefitali-e, okpála adu kutu ndjikpa ne ká bhisi. Bhú piga gba Manase-e, okpála adu kutu ndjikpa ne ká bhisi. ⁷ Bhú piga gba Simeona-a, okpála adu kutu ndjikpa ne ká bhisi. Bhú piga gba Levi-e, okpála adu kutu ndjikpa ne ká bhisi. Bhú piga gba Isakala-a, okpála adu kutu ndjikpa ne ká bhisi. ⁸ Bhú piga gba Djabulona-a, okpála adu kutu ndjikpa ne ká bhisi. Bhú piga gba Djodjefu-o , okpála adu kutu ndjikpa ne ká bhisi. Bhú piga gba Bendjame-e, okpála adu kutu ndjikpa ne ká bhisi. U atu kasé li ndu okpála bhomu-o hana.

Libi okpála inde li Ebhe alo o-o

⁹ Pipita-a, ma atsia matá 'kpí, ma au bhiti okpála na bhighbiti inde li kpála bini ti da nako alo gba o-o de. A du okpála na ndu bili hana, ne ndu opiga hana, ne ndu okongú hana. U alulu kala kiti na ngámá di ne kala Ndili Kandole-o . U adyidyí olobe na bububu, adu sakpa uo ne okpá ngulu. ¹⁰ U adu asusula ne angu o hana me:

«Mukobho ngayie ka Ebhe gba ní
inde adu pí kiti na ngámá-o,
di ne ka Ndili Kandole-o!»

¹¹ Ndu oandjelu hana alulu dengo kiti na ngámá-o, ne dengo obhelesi okpála di ne dengo okpála badha na ngangamba-o. U atu bhúla o ne kuto kala kiti na ngámá-o, u atsia adhögö Ebhe. ¹² U adu apa me:

«A adu moko!

A ayo me okpála toko Ebhe gba ní-o.

A ko Ebhe na sangu,
a bhú ani ne imbilangu.

A ayo me okpála gie heni pi ani, u manga ani.

A ko Ebhe na angu.

Ani kpekpeke, duduma ne duduma!

A adu mokol»

¹³ Suka obhelesi okpála bhomu-o ayi ma me: «Okpála inde adyi obubu lobe-e, a ko oda? U ayie la di su?» ¹⁴ Ma agie pi ani me: «Bhele kpála-a, mu mbila hana.» Ani atsia apa mu ma me: «A ko okpála inde apu bhú 'ngbé likabhu na ngbéngbé-o. U avulu olobe gba o-o, u atsia aleke ne ngute Ndili Kandole-o ngubula me akolo bubu.

¹⁵ Ka 'ngú ango-o, u alulu kala kiti na ngámá gba Ebhe-o. U ngamene kulu lio pi ani sukpe ne ngbikpi hana bhú 'ngbé 'ti gba ani-o.

Kpála inde adu pi kiti na ngámá-a adú bhú dabili bini ne uo ngú nalila uo.

¹⁶ U djé matá gumu belegu de bini, u djé di matá gumu 'ngu belegu de bini.

Ela, i du di-e mangua kpá bili dho-ie tsulu matá uo de.

¹⁷ Padhá de, anga Ndili Kandole inde alu kala kiti na ngámá-a adú maka mulila gba uo ngae.

Ani ató bhúla uo li bili li okpongu na mukobho nde lie-o. Ebhe tsia kúo ngula sala uo hana.»

8

Ndili Kandole-o asoko malika na mananika-o

¹ Nedhinga li Ndili Kandole-o asoko malika na mananika-a lie, sukpe andjili abhúla má bulu, masikpe de miniti ndjikpa bata. ² Pipita-a, ma au oandjelu mananika inde alulu kala Ebhe-o. U aha ototi pi uo mananika.

³ Andjelu koko bini ago alu dengo misa natsulu mungotsi pi Ebhe-o. A adu sakpa ani ne saani na olo ngú natsulu bande. U aha bande pi ani bhelé ngú napa me ani tsulu pi Ebhe bhú dabili bini ne omayo gba okpála gba Ebhe-o. Ani tsulu pi misa inde u abho e li

olo-o. Misa ango-o adu kala kiti na ngámá-o. ⁴ Ngúwa bandele li andjelu-o adu atsulu e-e, a'e'e lie abhúla bhú dabili bini ne omayo gba okpála gba Ebhe, anu a'u kala Ebhe. ⁵ Pipita-a, andjelu-o aha saani natsulu bandele-o. Ani abedhe ne djua inde adu oo-o, ani atsia abhike píla doto. Ekpí andjengene, mgbálá asula, adjigidjo adhika.

Ototi badha na kalanu-o asula

⁶ Abhomu-o, oandjelu mananika inde aholo ototi mananika-a aleke lio ngu na'u'u.

⁷ Andjelu na bini-e a'u toti gba e-o. Itimeli, ne djua bhú dabili bini ne ngute abala píla doto. A tsia atsulu té doto di ne ondula. I du me u nde agbo bhusu doto di ne ondula hana bata-a, akunda napa me bini bhú káká atsulu bhomu-o ngae.

⁸ Pipita-a, andjelu na bhisi-e a'u toti gba e-o. Ehe bini maka 'ngbé 'ta djua ati bhú 'ngbé 'ngu. Engu agbo bhusu e bata, bhe bini-e atsia adji lie ngute. ⁹ Té ndu 'he li Ebhe abho e hana inde ngadu abhú 'ngbé 'ngu, bhú dabili bini ne ozabu-o atsia amu. U po bhúla ndu 'he inde li Ebhe abho e bhú 'ngbé 'ngu, u po di bhúla ozabu hana-a, u tsia gbo bhusu bhusu bata-a akunda napa me akpi bhomu-o ne bini bhú káká.

¹⁰ Abhomu-o, andjelu bhe na bata a'u toti gba e-o. 'Ngbé ikupala bini inde li zi e adu atsi maka zi 'ké na ngbéngbé ayie abhúla, ati kuto. A atsia ati pí té ongade 'ngu di ne okpongu-o. I du me u nde apo bhúla ongade 'ngu di ne ondjingu hana-a, u tsia gbo bhusu bhusu bata-a, akunda napa me ati bhomu-o pí bini bhú káká. ¹¹ A adu 'li ikupala ango-o me «Ehe na susu.» Abhomu-o, té oengu-o akolo susu. Bhelé na okpála inde andji-e atsia amu, anga akolo susu.

¹² Pipita-a, andjelu na badha-a a'u toti gba e-o. A asu té ela ne té epe di ne té oikupala. I du me u nde agbo bhusu ela ne epe di ne oikupala ne ndundundu bata-a, akunda napa me a asu bhomu-o bini bhú ká ndundu hana. A atsia abili bhúla uo hana li pápá bini bini. Zi ngbikpi du matá nasu libhomu de, abana di zi epe. I du me u nde agbo bhusu zi ngbikpi ne ndundundu bata, u gbo di bhusu zi epe ne ndundundu bata-a, akunda napa me bini bhú ká ndu uo bini bini hana du matá nasu-u de.

¹³ Pipita-a, ma atsia matá 'kpí, ma adje ndua bini me ani nde ngakodho 'kpí abhúlá tsutsu naali. Ani adu nasusula me: «A ko likabhu! A ko likabhu! A ko likabhu pi okpála na doto li oandjelu bata bhe koko a'ú toti gba o-o lie ko.»

9

Andjelu na bhuluvue a'u toti gba e-o

¹ Abhomu-o, andjelu na bhuluvue a'u toti gba e-o. Ma au ikupala bini ayie abhúlá, ati píla doto. U atsia aha lifungula na 'bhø tsu 'dú-o* pi ikupala ango-o. ² Ikupala bhomu-o abhulu bhøbhø. Ngúwa bini akoto bhúbhú maka ngúwa na ndingidhi djua. Bhúla ela ne bhúla 'kpí atsia abili ka ngúwa ango-o má pi! ³ Omakilingbo aze bhú ngúwa bhomu, u atsia ayangba píla doto. U aha nani pi uo sili maka bhende gba oapekebhe. ⁴ U aha líli pi uo me u améne ulu sisiti de, u améne ondula sisiti de, u améne di ohe inde ngakø bhú doto sisiti de. Engú bini, u mene mangbo sisiti bha bini okpála bhende li kasé gba Ebhe-e nde pidi o ade-o. ⁵ U ha kpadji pi uo ngú nabhili okpála bhomu-o de, engú bini, u to mbolo li uo ngú epe bhuluvue. Mbolo ango-o adú ami li uo maka ngabhø

* 9:1 9:1 Tsu 'dú: A ko bili inde li osisiti bua ngadu li e.

apekebhe amimi lie me a nde adho kpála-o. ⁶ Bhú epe bhuluvue bhomu-o, okpála agíli kuo, engú bini, u úu de. U adú ne gumu namu, engú bini, kuo akpé de uo tsutsu.

⁷ Omakilingbo bhomu-o adu maka opunda inde bedhe ngú egú. A adu pí 'ndji uo ne ehe maka ndata na ngámá inde u abho e li olo. Bhúla uo adu maka bhúla okpálakuti. ⁸ Sundjo adu bhú 'ndji uo ndjandjandja maka sundjo olisi. 'Te uo adu maka ote okingbi. ⁹ Mbulu uo adu mugito me u adyi tété bongo na kalase. Gili mbudha uo adu au mugito me a ko gili bhiti opunda inde adji bhú 'gú. ¹⁰ A adu li uo ne soso maka 'so apekebhe, atsia adu bhúbhú ne sili inde u adu ato mbolo li okpála ne e ngubula epe bhuluvue-o. ¹¹ Ngámá gba uo adu ne andjelu na tsu 'dú. A adu 'li ani bhú eli gba omaYuda me: «Abadona.» Bhú eli gba oGiliki-e, a adu 'li ani me: «Apoliona.» A akunda napa me bhulu nabholo kuti.

¹² Likabhu na bini-e akodho 'kpí akodho. 'E-e! Likabhu koko bhisi matá ngago pipita.

Andjelu na madhia a'u toti gba e-o

¹³ Pipita-a, andjelu na madhia a'u toti gba e-o. Ma adje eli ayie ne li odje misa natsulu bandele pi Ebhe-e badha hana. Misa ango-o adu kala Ebhe, u amene li olo.

¹⁴ Eli ma adje e apa pi andjelu na madhia inde adu ne toti sakpa e me: «Bhulu oandjelu badha inde u agbigbite o ne ekpú dengo ngade 'ngu na Efalate-o.» ¹⁵ U atsia abhulu oandjelu badha-o. Li nedhinga bhomu-o, bhú ekpí bhomu, bhú epe bhomu di ne kalanga bhomu-o, oandjelu bhomu-o adu nani bedhe ngú nabhili té okpála na doto. A akunda napa me, i bhaka okpála bata-a, u bhólo bini bhú ká uo.

¹⁶ U atsia apa di alo na osudha inde adu agu 'gú me u nde ne punda-a muma. A adu osudha koto ne koto.

¹⁷ Lele li opunda di ne osudha inde adu pí uo akoto li ma lie bhú 'he maka loto-o adu me: u adyidyí ombulu bongo na kalase me a nde andjundju maka djua, bibili maka kokpí, a adu di ndjendje maka 'kpá bhugu. 'Ndji opunda ang-o adu maka ondji kingbi. Adu naze bhú 'bhø uo ne djua, ne ngúwa di ne baluti. ¹⁸ Té okpála na doto atsia amu ka olikabhu bata inde adu aze bhú 'bhø opunda bhomu-o. A akunda napa me okpála adu amu ka djua, ne ngúwa di ne baluti. I bhaka okpála bata-a, akunda napa me a bhólø kpála bini bhú ká uo. ¹⁹ Padhá de, anga angu opunda bhomu-o bhú 'bhø o di ne bhú 'so o, anga 'so uo mana kpulu. A tété ne 'ndji 'ndji inde u ngamene okpála ne e sisiti-o.

²⁰ Dú okpála bhe atigala-a, inde i mu ka olikabhu bata bhomu-o de-e, u dji bua o li nadhøgø oehe inde u amene e ne 'kpa o-o de. U 'o nadhøgø osisiti bua de, ne okulu 'he na olo ne aladja di ne bhe na kalase na kpéke mase, ne obhe na teme, i du di-e obhe na ndula-a de. Okulu 'he ang-o u 'kpí de, u dje 'kpí de, u dhuku di-i de. ²¹ Okpála ang-o dji bua o li nabhili okpála de. U dji di bua o li kobha gba o-o de. U dji di bua o li namene zabhe gba o-o de. U dji di bua o li ezi gba o-o de.

10

Andjelu inde adu sakpa e ne mboye 'kpá balua-o

¹ Pipita-a, ma au andjelu koko bini na angu ayie abhúla. Bongo gba ani-e adu maka ndindi, atsia abuku ani má bhelele! Makilima aga 'ndji ani ngbalina, bhúla ani adu maka ela. 'Dhu ani adu maka dingidhi djua. ² A adu sakpa ani ne mboye 'kpá balua inde u abhulu e mabhulu. Ani a'o 'dhu e na kokpa-a pí 'ngbé 'ngu, ani atsia a'o bhe na gali-e pí doto. ³ Ani asula kpekpeke maka kingbi inde

ngangulumba. Aní asula lie, mugbálá mananika atsia asula. ⁴ Ma di me ye engú inde lí omugbálá mananika bhomu-o apa e bhú nasula ka o-o. Engú bini, ma adje eli bini ayie abhúlá, atsia apa muma me: «Wo engú inde lí omugbálá mananika bhomu-o apa e mawo. Mo oyé-e de.»

⁵ Abhomu-o, andjelu inde ma de au e me aní nde a'o 'dhu e bini pí 'ngbé 'ngu, koko pí doto-o a'e 'kpa e na kokpa-a ne bhúlá. ⁶ Aní atsia atu silika ne 'lí Ebhe inde bhú mukobho duduma ne duduma-o, Ebhe inde abho kokpí di ne ndu 'he hana inde bhúbhú-o, abho doto di ne ndu 'he hana inde bhúbhú-o, inde abho 'ngbé 'ngu di ne ndu 'he hana inde bhúbhú-o. Andjelu ango-o apa me: «Nedhinga matá-a ade! ⁷ Engú bini, nedhinga lí andjelu na mananika-a ahólo na'u totí gba e lie, abhomu-o Ebhe tsía méne engú inde aní awo nani e ko. Aní améne maka aní apa nani pí obalise gba e opolofeta lie ko.»

⁸ Abhomu-o eli ma de adje igini e ayie abhúlá-a apa matá muma me: «Nu ha mboye 'kpá balua inde abhulu lie mabhulu-o sakpa andjelu alu me aní nde a'o 'dhu e bini pí 'ngbé 'ngu, ne koko pí doto ko.» ⁹ Ma atuto líma de andjelu-o. Ma atsia ayo ka aní me aní ha mboye 'kpá balua-a muma. Aní agie muma me: «Haha, amba mu zu. A adú bhú 'bho mu kpikpili maka 'mu eú, la mo obhí lie, a adú bhú 'ndja mu susu.» ¹⁰ Ma aha mboye 'kpá balua sakpa andjelu-o, ma atsia azu. A adú bhú 'bho ma kpikpili maka 'mu eú. Engú bini, ma azu lie, a adú bhú 'ndja ma susu. ¹¹ Abhomu-o, u atsia apa muma me: «A ayo matá me mu kpokpo 'ngú lí Ebhe apa me ní améne e pí bhiti okpála na ndu bíli hana-o, engú aní apa me ní améne e pí bhiti okongú, di ne pí bhiti ongbengbe ongámási-o.»

11

Ebhe atima opolofeta bhisi

¹ Pipita-a, u aha mbamba muma bini. A adu maka ndula u apipima 'he ne e-o. U atsia apa muma me: «Nu pima 'ngbé 'ti Ebhe di ne misa natsulu enu pi Ebhe-o. Mu tsia ko di alo gba okpála inde ngadhogò Ebhe bhú 'ngbé 'ti gba ani-o. ²Engú bini, 'o mbadhasu na 'ngbé 'ti Ebhe-e li ngongo. Mo opíma de, anga Ebhe apu nani bhobhomu-o pi okpála inde ne omaYuda ade-o. U adédele gudhu na bubu gba Ebhe-e ngubula epe ndjikpa badha ne ká bhisi. ³Ma atíma obhulu nakpo 'ngú gba ma bhisi-e me u nde adyi bongo na talia. Ma atíma uo ngú nakpokpo engú gba Ebhe. U akpókpo 'ngú ango-o ngubula ekpi koto bini, kámá bhisi ne ndjikpa madhia.»

⁴Obhulu nakpokpo 'ngú bhisi bhomu-o, a ko ondula na olive bhisi di ne otala bhisi inde ngalu kala Ngámá na doto-o. ⁵Li kpála le namene uo sisiti-e, djua koto bhú 'bhò uo, i tsia bhili obhulu yala gba uo-o. A bhomu-o lele maka u abholò bhulu yala gba o lie-o. ⁶A bhú uo ne angu nagbite kokpi ngubula me ebha adhi-i de, nakolo li 'kpi inde u andjia nakpokpo engú gba Ebhe-e lie-o. A di bhú uo ne angu nadi engu me akolo ngute. A bhú uo ne angu natu pòdjò pí doto me ndu olikabhu ngangá mene doto li ndu nedhinga hana inde u akunda lie.

⁷Nedhinga u andjia nakpokpo 'ngú li Ebhe atima uo ne e lie, enu inde adu bhú tsu 'dú-o há 'gú ne uo. Ani há angu uo, ani tsia bhili uo. ⁸Kuo uo atígala li 'ngbé 'hi kpadji na 'ngbé gudhu inde u agi nani Ngámá gba uo lie li kulusi-o. U agisila li gudhu ango-o 'ili. U agisila lili me Sodomo, i du di-e Edjipeto. ⁹U ziba de me okpála zi kuo uo-o de. Okpála na ndu bili hana, ne ndu opiga hana, ne ndu okongú hana adú ago natsia okuo uo ngú okpi bata

ne ndundu. ¹⁰ Okpála na doto akpí djali li nakpi ka uo-o. U améne anokomiá na djali, u tsia dú apu 'he sunda o. U améne mo-o anga opolofeta bhisi bhomu-o amene uo kpékpéke naali.

¹¹ Engú bini, pita ekpí bata ne ndundu bhomu-o, ewo bini na mukobho ayie agba Ebhe ali bhú uo, u atsia ayie bhúlá. Abhomu-o, 'ngbé tsulu na ngbéngbé ati pí okpála bhende adu natsia uo-o. ¹² Opolofeta bhisi bhomu-o atsia adje eli na kpékpéke inde ayie abhúlá. Eli ango-o apa pí uo me: «Yi 'u ei!» U atsia a'u'u abhúlá bhú ndindi me obhulu yala gba uo nde ngatsia uo. ¹³ Bha bhú nedhinga bhomu-o, kpéke adjigidjo adyiki bili, té gudhu-o atuko. I du me u nde agbo bhusu gudhu-o ne ndundundu ndjikpa-a, akunda napa me adjigidjo bhomu-o adyiki bini bhú káká. Abhomu-o, okpála ketø mananika amu ka adjigidjo ango-o. Obhe atigala-a, tsulu abedhe uo bedhe. U atsia adhøø Ebhe inde abhúlá-o.

¹⁴ Likabhu bhe na bhisi-e akodho 'kpí akodho. 'E-e! Bhe na bata agó mbia inde?

Andjelu na mananika-a a'u toti gba e-o

¹⁵ Abhomu-o, andjelu na mananika-a a'u toti gba e-o. Oandjelu atsia asula abhúlá kpekpeke me: «Nau na doto ibili sakpa ngámá gba ya, ne Masiya gba e-o.

Ngámá gba ya-a aú duduma ne duduma!»

¹⁶ Obhelesi okpála ndjikpa bhisi ne ká badha inde adulu pí odabili na ngámá gba o kala Ebhe-e atutu bhúla o ne kuto. U atsia adhøø Ebhe, ¹⁷ u apa me:

«Ebhe Ngámá Apí 'Kpí, ngamu kpála inde uu,
inde adu di nani uu,
ya ngatoko mu,
anga mo opana angu gba mu,

ndu 'ngú hana agie lie sakpa mu.

Mo otsia au ngámá pépé.

¹⁸ Opiga na doto azi nani mbutu li mu naali,
la mbia inde-e,

ke 'ngú gba mu-o ago pí uo ago.

Nedhinga nakodho 'ngú gba okpála inde amu-o akolo.

A ko nedhinga inde mo ogie bádha 'ngú lie

pí obalise gba mu opolofeta

di ne ndu okpála gba mu-o hana,

inde di ngamanga mu,

ongbengbengbe ne odjedjedje-o.

A ko nedhinga ngú nabhili obhe ngabhelo doto-o.»

¹⁹ Abhomu-o, 'ngbé 'ti Ebhe inde abhúlá-a abhulu
lie, u atsia au sanduku na gandja-o.* Ekpí andjengene,
mugbálá asula, adjigidjo di ne itimeli na kpekpeke ad-
hika.

12

Engú na ngangamba inde abhaka olo inde adu nazu

¹ Pipita-a, ma au engú bini na ngangamba ngamene lie
abhúlá: a adu olo bini inde adyi li kute e ela. Epe adu
sa 'dhu ani. A adu bhú 'ndji ani ne ndata na ngámá inde
li e ne oikupala ndjikpa ne ká bhisi. ² Olo ango-o adu ne
ebhi. Nedhinga ani adu adjeke nazu lie, ani adu natu
'ue ka nazu ka bhú 'bu e-o.

³ Engú na ngangamba koko amene matá lie abhúlá: a
adu 'ngbé kpulu na ngbéngbé. Kute ani adu mbembe má
ngua! A adu li ani ne ondji 'ndji mananika, di ne odidi
ndjikpa. A adu pí ndu ondji ani hana ne ndata na ngámá.

⁴ Ani apo té oikupala ne 'so e, ani atsia abala uo kuto. A

* 11:19 11:19 Sanduku na gandja: A ko sanduku inde u abu nani
opapala teme inde u aye olíli ndjikpa gba Ebhe-e bhú e-o.

akunda napa me u po bhúla ndu oikupala hana-a, u tsia gbo bhusu bhusu bata-a, ani abala kuto bhomu-o bini bhú káká. Ani atsia anu alu kala elee inde adu akunda nazu-o ngubula me, ni zu ndili li elee bhomu-o azu e bha li nedhinga nakoto ka ani-o. ⁵ Abhomu-o, elee-o azu ndili na bhobhoko. Ani au pi 'ndji ndu opiga hana ne angu. Kolo me-e, u atsia a'e ndili bhomu-o anu ne ani deno Ebhe, di ne deno kiti na ngamá gba ani-o. ⁶ elee-o atsia akpe abhu'gu li bili inde li Ebhe aleke nani e pi ani, ngu napa me ni ku ani ngubula ekpi koto bini, kama bhisi ne ndjika madhia-o.

⁷ Abhomu-o, gbele aka abhula. Mikaele ne oandjelu gba e agu 'ngbe kpulu-o. Kpulu ango-o atsia aholo di gbele bhú dabili bini ne oandjelu gba e-o. ⁸ Engu bini, Mikaele ne oandjelu gba e agboko egu-o. Kaka-a, 'ngbe kpulu-o ne oandjelu gba e sia mata bili da nadu abhula de. ⁹ U atsia abhike 'ngbe kpulu-o kilidjo. A ko kpulu na didili, inde u nga'i e me Djabulu, i du di-e Satana, bhulu napite okpala na doto libhomu-o. U abhike ani kuto bhú dabili bini ne oandjelu gba e-o.

¹⁰ Pipita-a, ma adje kpeke eli bini ayie abhula. Eli ango-o adu apa me:

«Nedhinga li Ebhe gba ni-e ngakobho okpala lie akolo!

Mbia inde-e, Ebhe gba ni-e asuno angu gba e me ni ne ngbe Ngama-a asuno!

Mbia inde-e, angu sakpa Masiya gba ani-o.

Padha de, anga u abhike bhulu napa 'ngu li ondaise ni-e akilidjo,

ngaani kpala inde adu apa 'ngu li uo pi Ebhe gba ni-e ngbikpi ne sukpe-o.

¹¹ Ondaise ni aha angu ani ka ngute gba Ndili Kandole di ne ka nakpokpo 'li Ebhe pi okpala.

U kpe kuo de, u atsia atse 'kpa li mukobho gba o ngubula me o mumu.

¹² Kaka-a, ne kokpí ne yi okpála inde ngadulu bhúbhú hana-a,
yi du bhú djali!

A ko la mangua likabhu dho pi yi okpála inde ngadulu píla

doto ne yi obhe ngadulu bhú 'ngbé 'ngu-o, anga djabulu akə agba yi akə.

Ani abedhe ne egú bedhe, anga ani mbila hana me nedhinga atigala pi ni bedi.»

¹³ Li 'ngbé kpulu-o au lie me u abhike ni kuto abhike-e, ani aholo nabhike ɛɛ inde azu igini ndili na bhobhoko bhomu-o. ¹⁴ Engú bini, u aha mbudha 'ngbé ndua pi ɛɛ bhomu-o ngú napa me ani 'ulu, amba ani nu du li bili inde u aleke e pi ani abhú 'gu-o. U atsia adu aku ani oo ngubula kalanga bata ne ndundu me 'ngbé kpulu-o nde to mbolo li ani de. ¹⁵ Abhomu-o, kpulu-o atsia azie engu bhelé nganda ɛɛ-o maka ngade 'ngu, da napa me akpe ne ani. ¹⁶ Engú bini, doto ago ateteke ɛɛ-o. Doto abhulu 'bhə e, atsia abhi engu li 'ngbé kpulu-o azie e-o. ¹⁷ Li bua kpulu-o ake lie ne ɛɛ-o, ani anu aha 'gu ne dú ongisi gba ɛɛ-o, obhende ngamanga Ebhe inde di ngalila kukulu 'ngú inde li Yesu ambamba ta e-o. ¹⁸ Pipita-a, 'ngbé kpulu-o anu adu pí sike lingo 'ngbé 'ngu.

13

'Ngbé kpulu-o aha angu gba e pi nute koko

¹ Pipita-a, ma au enu bini ngakoto abhú 'ngbé 'ngu. 'Di ani adu ndjikpa, 'ndji ani adu mananika. Ani adyi ndata na ngámá ne ndu odi e hana. Ani atsia adyi di o'ili nasobho Ebhe ne pí 'ndji e hana. ² Enu inde ma

au e adu maka sia. Odhu ani adu maka bhe gba onute, 'bhe ani adu maka 'bhe kingbi. 'Ngbé kpulu-o aha angu na ngbéngbé gba e pi enu-o. Enu-o atsia adu pí kiti na ngámá gba ani-o. ³ Suka ondji ani adu mugito me u abi eka bhe na mugwe mugwe, engú bini eka na mugwe mugwe ango-o atsia ambe. Engú bhomu-o atsia angamba okpála na doto libhomu. Kaka-a, u atsia akpata enu bhomu-o. ⁴ Ndu okpála hana atsia aholo nadhogé 'ngbé kpulu-o, anga ani aha angu pi enu-o. Ndu okpála hana adhogé di enu-o ne napa me: «A ko da inde maka enu inde? Ati da nagu ani da?»

⁵ U aha nani kpadji pi enu bhomu-o me ani du napa oeli na 'ngbé 'ndji, amba ani du di nasobho Ebhe. U aha angu pi ani ngú namene engú bhomu-o ngú epe ndjikpa badha ne ká bhisi. ⁶ Ani aholo napa osisiti 'ngú li Ebhe, ne nasobho 'li ani di ne nasobho bili inde ani adudu li e, di ne okpála hana inde adudu abhúlá-o. ⁷ U aha kpadji pi ani me ani gu okpála gba Ebhe di ne naha angu uo. U aha angu pi ani pí 'ndji okpála na ndu bili hana, ne ndu opiga hana, ne ndu okongú hana. ⁸ Ndu okpála na píla doto hana inde u ye nani 'li o bhú bhuku na mukobho-o de-e, adhogé ani. Bhuku ango-o, a ko bhe gba Ndili Kandole inde u abhole e-o. U ye nani 'li uo bhúbhú de, naye maka li Ebhe abho doto lie-o.

⁹ Yi dje ndjindji, i du me a nde li yi ne djedje naje 'kpí ko.

¹⁰ Kpála inde ayo me ani nu bhú tikpu-o,
anú bha bhú tikpu.

Kpála inde ayo me ani kpi li mbotia-a,
akpí bha li mbotia.

Kaka-a, a ayo me okpála gba Ebhe-e du ne 'ndjá bua,
di ne nabhuka .

Enu koko akoto bhú doto

¹¹ Pipita-a, ma au enu koko ngakoto bhú doto. Adu bhú 'ndji ani ne didi bhisi maka ndili kandole. Ani atsia adu agama 'ngú maka 'ngbé kpulu. ¹² A adu di bhú ani ne angu maka angu inde adu bhú enu bhende akoto bhú 'ngbé 'ngu-o. Ani adu amene 'he ne di kala enu bhe na 'ngbé 'ngu-o. Ani adu apa pi ndu okpála na doto hana me, u dhogho enu na 'ngbé 'ngu li eka na mugwe mugwe gba e ambe-o.

¹³ Enu bhe na bhisi inde-e adu amene ongamba 'ngú na ngbengbengbe. Ani adu belegu nagbele djua nayie abhúlá nakó pí doto. Ani adu amemene li djila ndu okpála hana. ¹⁴ Ani adu apipite ndu okpála na píla doto hana inde u ye nani 'li o bhú bhuku na mokobho-o de-o. Ani adu apipite uo ne ongamba 'ngú inde ani adu amene e li djila enu na 'ngbé 'ngu-o. Ani adu akata uo me u bho kulu enu inde abi nako eka na mugwe mugwe li mbotia, eka ango-o atsia ambe-o.

¹⁵ Enu na bhisi-e asia angu ngú nato ewo bhú kulu enu na bini-o, ngubula me a du nagama 'ngú, amba a du nabhili ndu okpála hana inde i dhogho ni de-o. ¹⁶ Enu ango-o aye tele li ndu okpála hana. Ani aye li okpála koko li 'kpa o na kokpa, ani aye li okpála koko pidi o, abana i du mboye ndili, abana i du bhele kpála, abana i du bhulu tia, abana i du bhulu ndibhili, abana i du bali, abana i du kpála inde bhú bali ade. ¹⁷ Kpála bini ti da nakala 'he de, i du di-e natsindji 'he de, i du me tele nde li kute ani ade-o. Tele ango-o, a ko 'li enu bhomu, i du di-e alo na 'li ani-o. ¹⁸ A inde-e nedhinga inde ayo ne imbilangu. Kpála inde ne imbilangu-o tí da nambila ta alo gba enu-o, anga alo ango-o viti bini ne 'li kpála-kuti. Alo ango-o kámá madhia, ndjikpa madhia ne ká madhia.

14

Okpála inde li Ndili Kandøø-o akala o

¹ Ma atsia matá 'kpí, ma au Ndili Kandøø-o me ani nde alu pí eta na Siona . Okpála kəthə kámá bini, ndjikpa badha ne ká badha inde u aye 'li Ndili Kandøø di ne 'li 'Dyi ani pidi o alulu de ani. ² Pipita-a, ma adje eli ayie abhúlá. Eli ango-o adu mugito me a ko gili wowo 'ngu, maka gili mughalá na kpekpeke. Eli inde ma adje e adu maka gili dumu, nedhinga li obhubhulu-o abhibhi lie-o. ³ Bhiti okpála bhomu-o adu ali etsi na mbia kala kiti na ngámá, di ne kala okpála badha na ngangamba ne obhelesi okpála-o . Kpála bini ti da nale etsi ango-o de, bha bini okpála kəthə kámá bini, ndjikpa badha ne ká badha li Ndili Kandøø-o akala o píla doto-o. ⁴ Ngauo-o, u siti lio ne olisi de. U alila lio bubu kala Ebhe. U ngakpata Ndili Kandøø-o ne ndu bili hana ani nganu li e-o. Ani akala nani uo bhú ká okpála-kuti ngubula napu uo pi Ebhe di ne pi e bhubhulu maka gina ngua. ⁵ Eu koto nani bhú 'bhø uo belegu de bini. Engu na sisiti napapa li uo ade.

Oandjelu bata akpokpo 'ngu pindji lele maka li Ebhe akódho 'ngu lie-o

⁶ Pipita-a, ma au andjelu koko. Ani adu akodho 'kpí abhúlá tsutsu naali maka edhu. Adu ka ani ne Bádha Ngali na duduma inde ani adu akpokpo e pi okpála na píla doto, okpála na ndu bili hana, ne ndu opiga hana, ne ndu okongú hana. ⁷ Ani adu nasusula kpekpeke me: «Yi kpe Ebhe, amba yi dhøø di ani! Padhá de, anga nedhinga me ani kodho 'ngu gba okpála na doto akolo. Yi dhøø kpála inde abho kokpi ne doto ne 'ngbé 'ngu di ne okpongu-o.»

⁸ Pipita-a, andjelu na bhisi-e akpata bhe na kalanu-o. Aní adu apa me: «Babilona na ngbéngbé-e ati! A ati na paká paká! Aní ase ndu opiga hana ne siti vino gba e-o. Vino ango-o, a ko zabhe inde aní ngamene e-o!»

⁹ Pipita-a, andjelu na bata akpata obhe bhisi bhomu-o. Aní adu asusula me: «Li kpála dhogò enu-o, ne kulu aní-e, li u aye di tele gba enu-o pidi e, i du di-e li 'kpa e, ¹⁰ kpála ango-o ndjí bhadi vino na ke 'ngú gba Ebhe-o! Ebhe atúko ngíli vino ango-o bhú kópo na ke 'ngú gba e-o! Ngua kpála bhomu-o asía likabhu bhú djua na baluti kala oandjelu na bububu di ne kala Ndili Kandole-o. ¹¹ Ngúwa na djua inde ngato mbolo li uo-o nga'u abhúlá ndu 'kpí hana. Ndu okpála hana inde ngadhogò enu, inde di ngadhogò kulu aní, inde u aye tele gba aní-e li o-o, ngazu likabhu ngbikpi ne sukpe. U guguo de.» ¹² Kaka-a, a ayo me okpála gba Ebhe inde ngakpata líli gba aní-e, inde di ngalila nabhuka gba o bhú Yesu-o du ne 'ndjá bua.

¹³ Pipita-a, ma adje eli bini ayie abhúlá, a atsia apa mu ma me: «Ye me: «A ko djali pi okpála inde amu nayie pi mbia inde-e me u nde abhuka Ngámá-o!» Bu Bhobua apa me: «A na paká, u guo ka bhiti kulu u amene e guguo. Padhá de, anga kulu gba uo-o ngakpata uo.»»

Nedhinga na'e nguwa na píla doto

¹⁴ Pipita-a, ma atsia matá 'kpí, ma au ndindi bini na bubu. A adu pí ndindi ango-o ne ehe maka kpála. A adu pí 'ndji aní ne ndata na ngámá inde u abho e li olo. A adu sakpa aní ne dhádha bini na dhedhe.† ¹⁵ Abhomu-o, andjelu koko bini akoto bhú 'ngbé 'ti Ebhe inde abhúlá-o. Aní atsia asula pi kpála inde adu pí ndindi-e me:

† 14:14 14:14 Tsia bhú Dan. 7:13.

«Ha dhádha gba mu-o, amba mu holo na'e nguwa abhiye. Padhá de, anga nedhinga na'e'e-e akolo. Nguwa na pía doto abhele ngú nakoko abhele!» ¹⁶ Abhomu-o, kpála inde adu pí ndindi-e apu ne dhádha gba e pía doto. Nguwa na pía doto atsia a'e lie.

¹⁷ Pipita-a, andjelu koko akoto bhú 'ngbé 'ti Ebhe inde abhúlá-o. A adu di ka aní ne dhádha na dhédhé.

¹⁸ Pipita-a, andjelu koko akoto lí bilí natsulu enu pí Ebhe-o. A adu bhú aní ne angu pí djua. Aní asula pí bhe adu ne dhé dhádha sakpa e me: «Ha dhé dhádha gba mu-o, amba mu ko vino inde pía doto-o nedi. Lílí-e ambe.»

¹⁹ Andjelu-o atsia apu ne dhádha gba e pía doto. Aní atsia ako vino na pía doto-o. Aní atsia abu bhú 'ngbé ngbøngøø na ke 'ngú gba Ebhe-o. ²⁰ U agbe ngbøngøø-o bhú gadhu-o kildjo, u atsia api lí vino-o. Abhomu-o, ngute atsia aze bhú ngbøngøø-o. Ngute ango-o anu a'u nakolo lí 'bhø opunda. A atsia ayangba masikpe de kilometele kámá bata.

15

Oandjelu mananika ago ne olikabhu mananika

¹ Pipita-a, ma atsia 'kpí, ma au matá engú na ngangamba koko akoto abhúlá. A adu engú na ngbéngbé inde di na tsulu tsulu. Ma au oandjelu mananika, a adu sakpa uo ne gba olikabhu mananika. Pipita-a, likabhu koko matá ade, anga a ngasuno ke 'ngú inde lí Ebhe apana e lí soso-o ngae.

² Pipita-a, ma au ehe bini maka 'ngbé 'ngu i mana bitolobi, a atsia amata lie ne djua. Ndu okpála hana inde aha nani angu enu-o, inde aha di angu kulu aní bhú dabilí bini ne alo inde ngasuno 'lí aní-e, alulu pí 'ngbé 'ngu ango-o. A adu sakpa uo ne odumu lí Ebhe aha e pí

uo-o. ³ U adu ali etsi gba Moidje , bali gba Ebhe-o, di ne etsi gba Ndili Kandole-o . Etsi ango-o adu me:

«Ebhe Ngámá Apí 'Kpí,
okulu gba mu-o ngbengbengbe.

A di na ngangamba.
'Ngbé Ngámá gba okpála,
okpadji gba mu-o ne okukulu kpadji,
a la di ngbingbili.

⁴ A mánga mu de da, Ngámá?
A adhogé mu de da?

Padhá de, anga mu bubu ngamu kpi mu kpi.
Ndu opiga hana agó atutu lipuku o kala mu.

Padhá de, anga mo opana ngbili 'ngú gba mu-o pi uo apana.»

⁵ Pipita-a, ma atsia 'kpí, ma au 'ngbé 'ti Ebhe inde abhulá-a abhulu lie. A adu bhúbhú ne 'ti ngbangbali li Ebhe adu asuno lie bhú e-o. ⁶ Abhomu-o, oandjelu mananika inde adu ne gba olikabhu mananika sakpa o-o akoto bhú 'ngbé 'ti Ebhe-o. U adyidyí obongo inde na kpéke mase,* inde avuvu má tuu tuu! U agbigbite di mbulu o ne mukabha na olo. ⁷ Suka okpála badha na ngangamba-a aha kópo na olo mananika pi oandjelu mananika-o. Okópo ango-o adu bedhe bedhe ne oke 'ngú gba Ebhe inde bhú mukobho duduma ne duduma-o. ⁸ Abhomu-o, 'ngbé 'ti Ebhe-e abedhe ne ngúwa bedhe ka zi Ebhe di ne angu gba ani-o. Kaka-a, kpála bini ti da nali bhú 'ngbé 'ti Ebhe-e de, nakolo li nedhinga li olikabhu mananika li oandjelu-o adu ne e amene lie lie-o.

* 15:6 15:6 Bongo na kpéke mase: U abho nani bongo ango-o li lene.

16

Okópo na ke 'ngú gba Ebhe

¹ Pípita-a, ma adje kpéke eli ayie ne bhú 'ngbé 'ti Ebhe . Eli ango-o apa pí oandjelu mananika-a me: «Yi nunn, amba yi tuko okópo na ke 'ngú mananika gba Ebhe-e pía doto!»

² Andjelu na bini-e ann, aní atsia atuko ke 'ngú inde adu bhú kópo gba e pía doto. Abhomu-o, oeka na sisiti, inde di nake make atsia aze li kute ndu okpála hana inde adu ne tele gba enu-o, inde adu di natoko kulu ani-o.

³ Andjelu na bhisi-e atuko ke 'ngú inde adu bhú kópo gba e pí 'ngbé 'ngu. 'Ngbé 'ngu-o akolo maka ngute kpála inde akpi. Abhomu-o, ndu ohe hana inde adu bhú 'ngbé 'ngu-o me a nde uu-o atsia amu.

⁴ Andjelu na bata-a atuko ke 'ngú inde adu bhú kópo gba e bhú ongade 'ngu, ne bhú okpongu. A atsia adji lie ngute. ⁵ Ma atsia adje andjelu inde adu ne angu pí ongu-o ngapa me:

«Ngamu kpála na bubu, inde uu, inde adu di nani uu-o, mu ne ngbili kpála , anga mo opana ngbili 'ngú gba mu-o.

⁶ Padhá de, anga okpála abhili okpála gba mu-o di ne opolofeta .

Mo oha bhadi pí uo ngute me u ndji.

U asia engú inde atí ne uo-o!»

⁷ Pípita-a, ma adje eli akoto pí misa natsulu mungotsi pí Ebhe-o. Eli ango-o adu apa me:

«A ko paká, Ebhe Ngámá Apí 'Kpí,
ndu 'ngú mo okodho e hana-a,
mo okodho li lelele,
a la bhadi ngbingbili.»

⁸ Andjelu na badha-a atuko ke 'ngú inde adu bhú kópo gba e píla ela. Aní atsia aha kpadji pí ela me a atsulú okpála ne djua gba e-o. ⁹ Abhomu-o, bilí akpa na mugwe mugwe, okpála atsia atsulú kaka. U asobho 'lì Ebhe inde adu bhú e ne angu ngú natima ngua oke 'ngú bhomu-o. Engú bini, u dji bua o ngú nadhøgø Ebhe de.

¹⁰ Andjelu na bhuluvue atuko ke 'ngú inde adu bhú kópo gba e pí kiti na ngámá lì enu-o adu nadu pí e-o. Abhomu-o, bití agba kuti-ngámá gba enu-o. Okpála atsia adu nazu 'mi o ka líkabhu. ¹¹ U adu asobho 'lì Ebhe abhúlá ka olíkabhu gba o di ne ka oeka inde adu lì uo-o. Engú bini, u dji bua o lì osisiti 'ngú inde u adu namene e de.

¹² Andjelu na madhia-a atuko ke 'ngú inde adu bhú kópo gba e pí ngade 'ngu na Efalata. Engu-o atsia a'ulu hana ngú naka kpadji pí ongámási inde ngayie ne ndjongu-o. ¹³ Abhomu-o, ma au osisiti bua bata ngakoto bhú 'bhó 'ngbé kpulu-o ne bhú 'bhø enu-o, di ne bhú 'bhø polofeta na eu-o. Osisiti bua ango-o adu maka omabiana. ¹⁴ A ko osisiti bua inde lì djabulu atima o-o. U adu amene ongamba 'ngú . U adu nanu agba ongbengbe ongámási na doto libhomu ngú napo bhúla uo ngubula gbele na 'ngbé 'kpí gba Ebhe Apí 'Kpí-o.

¹⁵ Ngámá Yesu apa me: «Tsitsia! Ma ngago maka bhulu 'zi! A ko djali pí kpála inde lì zuku, inde ngalila obongo gba e lì kute e ngú napa me ni anú ndumbu de, me ni asia numu de ka nakoto bhú djila okpála ndumbu-o.»

¹⁶ Osisiti bua apo bhúla ongbengbe ongámási lì bilí inde u a'i e bhú eli gba omaYuda me Alamagedo.

¹⁷ Andjelu na mananika-a atuko ke 'ngú inde adu bhú kópo gba e atu 'kpí. Kpéke eli bini atsia akoto

abhú 'ngbé 'tí Ebhe. A ayie lí pápá na kiti na ngámá-o. A apa me: «A amene lie amene!» ¹⁸ Abhomu-o, ekpí andjengene, mṽgbálá asula, adjigidjo na kpekpeke adhika. Ngua 'ngú bhomu-o mene nga naní lie kalanu de, nayie maka lí Ebhe abho kpála píla doto lie-o! ¹⁹ 'Ngbé gudhu na Babilona agugumu bhusu e ne ndundundu bata. Abhomu-o, ndu ogudhu na okuti hana atuko kuto. Abhomu-o, Ebhe atsia a'o nga la 'to e 'to 'ngbé gudhu na Babilona. Aní atsia aha pí aní kópo na vino na ke 'ngú gba e na sisiti inde adu adula bhú e madula me aní ndji. ²⁰ Ndu okpeme hana atsia angita, ndu oeta hana atsia angita di. ²¹ Ongbengbe itimeli na titili masikpe de kilo ndjikpa badha atsia abala pí okpála. Abhomu-o, okpála atsia asobho Ebhe ka likabhu na itimeli-o. Padhá de, anga likabhu ango-o adu kpekpeke na kuo kuo.

17

Nakodho 'ngú gba okpála na Babilona

¹ Abhomu-o, suka oandjelu mananika inde i de ne okópo na ke 'ngu-o sakpa o ago apa mu ma me: «Gogo, ma asúno pí mu lele maka lí Ebhe akodho 'ngú gba 'ngbé bhulu zabhe-e lie-o. A ko 'ngbé gudhu inde u ayiki e lingo ongbengbe ongade 'ngu bhelé. ² Ongbengbe ongámási na doto amene zabhe ne aní. Okpála na doto atsia alangba ne vino gba aní na zabhe-o.»

³ Abhomu-o, Bu Bhobua abedhe ma, Andjelu-o atsia anu ne ma abhú mili bili. Ma au 00 bini inde adu pí enu na mbembe má ngua! Enu ango-o abuku kute e libhomu ne o'ili inde ngasobho Ebhe, 'ndji 'ndji adu lí aní mananika di ne didi ndjikpa. ⁴ 00 ango-o adyi obongo na mbembembe na tia naali. Aní atsia adyi omagege na olo ne obhe na teme na mase naali di ne

omayaka li kute e bedhe. A adu sakpa ani ne kopo na olo inde abedhe ne zibotu bhú e bedhe ka zabhe gba ani-o. ⁵ U aye pidi ani 'ili bini inde li ta e awo lie mawo. 'Hi ango-o me: «BABILONA NA NGBÉNGBÉ, 'HI OBHULU ZABHE DI NE OSISITI 'NGÚ NA DOTO-O.» ⁶ Ma au me ɔlɔ ango-o alangba ne ngute okpála gba Ebhe-o, ngute obhe u abhili o ka u abhuka Yesu lie-o. Ma au ani lie, ma angamba naali.

⁷ Abhomu-o, andjelu-o apa mu ma me: «Mu ngangamba ka ni? Ngama-a, ma ambamba ta 'ngú gba ɔlɔ bhomu-o ne enu inde abi ani-e pi mu, enu inde li e ne 'ndji 'ndji mananika di ne odidi ndjikpa-o. ⁸ Enu inde mo ou e bhomu-o, adu nani tété. La-a, ani matá ade. Ani akoto bhú tsu 'dú-o, ani tsia nú bhú ngita gba e-o. Okpála na doto inde u ye nani 'li o bhú bhuku na mukobho-o de nayie maka nani li Ebhe abho doto lie, angamba li nau enu-o. Padhá de, anga ani adu nani tété, la-a ani matá ade. Engú bini, ani akoto matá ne toto.

⁹ A ayo mbia inde-e nadu ne imbilangu di ne bua nakpokpo kú 'ngú. Ondji 'ndji mananika-a, a ko oeta mananika inde li ɔlɔ-o ngadu pí e-o. A ko di ongbengbe ongámási mananika-o. ¹⁰ Obhe bhuluvue bhú ká uo-o, kulu gba uo-o andjia, bhe na madhia ngabha bhú kulu, bhe na mananika-a go nga de. Ani agó lie, ani améne bha nedhinga masudha. ¹¹ Enu inde adu nako tété-e, inde matá tété ade bhomu-o, ngaani makpe-e, a ko 'ngbé ngámá na madjina. Ani bhú ká ongbengbe ongámási mananika-o. Ani adjia bhú ngita gba e-o.

¹² Odidi ndjikpa inde mo ou e bhomu-o, a ko ongbengbe ongámási ndjikpa inde i 'u nga pí kiti na ngámá de-o. Engú bini, u asía angu ngú nau bhú dabili bini ne enu-o ngú saa bini. ¹³ Ndu ongámási ndjikpa bhomu-o hana bha ne koli mabhundja bini. U ne gumu naha angu di

ne ngámá gba o ngu namene kulu lio pi enu-o. ¹⁴ U agu gbele ne Ndili Kandole-o, la-a, Ndili Kandole-o ahá angu uo. Padhá de, anga a ko Ngámá gba ongámási, a ko 'Ngbé Ngámá gba ongbengbe ongámási. Omaha Ndili Kandole inde ani a'li o-o, ani atsia alo o-o, u ahá bhadi angu uo bhú dabili bini ne ani. U ngakpata Ndili Kandole-o ne bua o bini.»

¹⁵ Pipita-a, andjelu-o apa matá mu ma me: «Oengu inde mo ou e li bili inde li ole na zabhe alu li e bhomu-o, a ko okpála na ndu bili hana, a ko bhiti okpála, a ko opiga di ne okongú. ¹⁶ Odi 'nu ndjikpa ne enu inde mo ou e bhomu-o, ayála ole na zabhe-o. U bhá 'he li ani hana, u a'ó ká ani ndumbu, u azú mbilika ani, u tsia bú dú ani bhú djua. ¹⁷ Padhá de, anga Ebhe a'o li bua uo me u mene mukunda gba ani-o. U améne ne bua bini me o ha angu na ngámá gba o me o mene kulu lio nedi pi enu-o, nakolo li nedhinga li 'li Ebhe améne lie lie-o. ¹⁸ La di-e, ole inde mo ou e-e, a ko 'ngbé gudhu inde ngau pí ongámási na doto-o.»

18

Nati ka gudhu na Babilona

¹ Pipita-a, ma au andjelu koko ayie abhú lá ngakoto kuto. A adu bhú ani ne angu na ngbéngbé. Abhomu-o zi ani abha doto libhomu. ² Ani asula kpekpeke me: «'Ngbé Babilona ati-e ngae! 'Ngbé Babilona ati-e ngae!

A akolo ibili bili li odjabulu ngadulu li e, bili inde li ndu osisiti bua hana ngadulu li e.

A bhomu-o bili li odhu ne onu inde kala Ebhe sisiti-e ngadulu li e-o.

³ Padhá de, anga ndu okpála na doto hana andji siti zabhe gba ani-e
maka okpála andjindji vino lie-o.

Ongbengbe ongámási na doto amene zabhe ne aní,
 obhulu natsindji 'he na píla doto atsia akpo di lí
 angu na bhiti tia gba aní-o.»

⁴ Pípita-a, ma adje eli koko ayie abhúlá. A adu apa me:
 «Ngayi okpála gba ma-a, yi ze bhú Babilona zeze,
 amba yi améne siti 'ngú bhú dabilí bini ne aní de,
 ngú napa me yi asía olikabhu inde abháka aní-e bhú
 dabilí bini ne aní de.

⁵ Padhá de, anga osisiti 'ngú gba aní-e apo 'ta e akolo
 makolo abhúlá.

Ebhe atsia abhundja osisiti 'ngú gba aní-o.

⁶ Yi mene aní maka aní amene okpála koko lie-o.

Yi gie siti 'ngú aní amene e pí aní bhútsibhútsi
 bhisi.

Yi ha pandí inde ane bhe gba aní-e ne kpéke bhútsibhútsi
 bhisi-e pí aní

bhú kópo inde aní adu a'o pandí gba e bhú 'bhé
 okpála ne e ko.

⁷ Aní adu akpi ndjili naali bhú asasaua na tia gba e-o.

Kaka-a, yi gie di likabhu ne mulopolo pí aní lí lelele.

Padhá de, anga aní ngapa lí bua e me:

«Ma adu pí kiti na 00 gba ngámá, ma ne 0k0 ade,
 ma adú galikpe bhú talia de.»

⁸ Kaka-a, ndu okpekpeke da 'ngú inde a'o lie pí aní-e agó
 galikpe atí pí aní

lí koli 'kpí bini ndundu hana.

Okpekpeke da 'ngú ango-o ngae inde: nakpi ka okpála,
 talia di ne gumu,

lí djua tsia tsúlu di aní hana má kpəkəbhə!

Padhá de, anga Ngámá Ebhe inde akodho 'ngú gba aní-e,
 ne kpála na angu.»

⁹ Abhomu-o, ongbengbe ongámási na doto inde-e
 amene zabhe bhú dabilí bini ne aní. U akpi ndjili ne aní

li bhiti tia gba ani-o. Li u aú ngúwa djua atsúlu ani-e lie, u kú 'gbá, u tsia lópolo di lio ngú ani. ¹⁰ U alúlu de ani tsutsu ka nakpe likabhu inde abhaka ani-o. U tsia pá me: «A ko likabhu na ngbéngbé pi mu, Babilona!

Mu ne 'ngbé gudhu, mu la di ne angu.

La-a, Ebhe akodho 'ngú gba mu-o bha bhú saa bini padhá!»

¹¹ Obhulu natsindji 'he di ngaku 'gbá, uo di bhú talia li 'ngú gba ani-o. Padhá de, anga kpála bini ngakala matá ehe gba uo-o ade. ¹² Abana i du di-e olo, ne oaladja, ne oteme na mase ne omayaka, kpála bini ngakakala ade. Abana i du obongo na kpéke mase, ne ombembe obongo na zizi, ne obongo inde u abho e li dele gba okokó, kpála bini ngakakala ade. Abana i du ndu djua ondula na babadha sese hana, abana i du ndu djua oehé inde u abho e li 'te 'ya hana di ne obhe u abho e li ondula na mase hana, ne obhe u abho e li teme, kpála bini ngakakala ade. Abana i du di-e ndu djua kalase hana, kpála bini ngakakala ade. ¹³ Abana i du oehé ne okpálá koko inde u aleleke se bili abhú 'ti ne e, ne mila di ne omungotsi koko, ne bandele, kpála bini ngakakala ade. Abana i du pandi, ne emu, ne fufú, kpála bini ngakakala ade. Abana i du obagala, ne okandole, ne opunda, ne okpulukpulu, kpála bini ngakakala ade. Abana i du 'lá kpála-kuti, kpála bini ngakala susuka ade.

¹⁴ Obhulu natsindji 'he bhomu-o apa pi gudhu bhomu-o me:

«Ndu oehé inde mo okukunda e hana andjia gba mu andjia!

Ndu otia gba mu di ne obabadha 'he gba mu-o andjia ka mu andjia,
u ú matá gba mu belegu de bini!»

¹⁵ Obhulu natsindji 'he inde akpo li tia na gudhu ango-o alulu de ani tsutsu ka nakpe likabhu inde abhaka ani-o. U adu aku 'gba, u tsia lopolu di lio ngu ani. ¹⁶ U adu apa me:

«A ko likabhu na ngbéngbé pi yi,
okpála na 'ngbé gudhu-o!
Yi adyi li kute yi babadha bongo inde na kpéke mase.
Yi atsia adyi di li yi obongo na mase naali inde na mbembe
ma ngua,
inde li e ne zizi.
Yi adyi di omagege na olo bhú dabili bini ne oteme na
kpéke mase di ne omayaka.

¹⁷ Ndu 'he bhomu-o hana angita bha li saa bini ma kpikili!»

Abhomu-o, ndu obhulu nadjele zabu hana, bhú dabili bini ne okpála inde u abi o, okpála nadhuku pi 'ngbé 'ngu bhú dabili bini ne obhulu nagili tia pi 'ngbé 'ngu-o alulu mbo tsutsu. ¹⁸ U atsia adu asusula ka nau nguwa adu aze ka natsi ka gudhu-o me: «A akpo 'ndji e li 'ngbé gudhu inde-e ne bhedho?» ¹⁹ U adu aba embi bhú 'ndji o, u adu aku 'gbá, u atsia adu alopolu lio me:

«A ko likabhu na ngbéngbé pi yi, okpála na 'ngbé gudhu-o!
Bhiti tia gba yi-e ngae inde li okpála inde ngamene
kulu pi 'ngbé 'ngu-o

akpo ka e ko.

La-a, ndu 'he bhomu-o hana andjia bha li saa bini ma kpikili!»

²⁰ Ngayi okpála inde abhulá-a, yi kpi ndjili li nakpi ka gudhu ango-o!
Ngayi omaha Ebhe, ne yi obhulu titima gba Ebhe, di ne yi opolofeta, yi kpi ndjili!

Padhá de, anga Ebhe akodho 'ngú gba ani-e ka siti 'ngú inde ani amene e li yi ko!

²¹ Abhomu-o, andjelu bini na angu aha teme bini maka 'ngbé teme nadyi ngano, ani atsia atumba bhú 'ngbé 'ngu ne napa me:

«U atumba bhadi ngbé gudhu na Babilona ne kpéke me, kpála bini ú matá galikpe ani de.

²² Obhulu nabhi dumu bhí matá galikpe agba mu de. Obhulu na'u toti 'ú matá galikpe agba mu de.

Obhulu nali 'tsi lí matá galikpe agba mu de.

Obhulu ikalana dú matá di agba mu de.

Okpála dyí di matá ngano agba mu de.

²³ Zi tala dú matá di agba mu de.

U djé matá di 'li okpála inde aha lio agba mu de.

Padhá de, anga obhulu natsindji 'he inde adu bhú gudhu gba yi-e,

adu ongbengbe kpála na doto.

Obhulu kobha gba yi-e apite ndu okpála hana.

²⁴ Okpála na Babilona abhili opolofeta,

ne okpála gba Ebhe di ne ndu okpála hana inde u abhili o pía doto-o.»

19

Etsi ngú nadhøø Ebhe

¹ Pipita-a, ma adje eli kpekpeke ayie abhúlá. Eli ango-o adu mugito me bhiti okpála ngagama 'ngú. U adu apa me:

«Aléluya! Yi toko Ebhe, Ngámá gba ní-o!

A ko mukobho, a ko Ebhe na sangu , a ko Ebhe na angu!

² Engú ani ngakodho e hana-a, ani ngakokodho li lelele, a la bhadi ngbingbili.

Padhá de, anga aní akodho 'ngú gba 'ngbé bhulú
 zabhe inde adú nako
 asiti 'ndjì okpála na doto ne zabhe gba e ko.

Aní atsia agisila engú nabhili obalise gba e lí aní.»

³ U atsia apa matá me:

«Aleluya! Yi toko Ebhe, Ngámá gba ní-o!

Ngúwa inde ngakoto bhú gudhú-o nga'ú abhúlá
 dúduma ne dúduma.»

⁴ Obhelesi okpála ndjikpa bhisi ne ká badha bhú dabili
 bini ne okpála badha na ngangamba-a atutu lipaku o
 kuto, u atsia adhөгө Ebhe inde ngadu pí kiti na ngámá-o.
 U adú apa me:

«A dú moko! Aleluya! Yi toko Ebhe, Ngámá gba ní-o!»

Anokomia gba Ndili Kandөлө-o

⁵ Abhomú-o, eli bini ayie ne lí pápá na kiti na ngámá-o.
 Eli ango-o apa me:

«Yi toko Ebhe gba ní-o, ndú yi obalise gba aní-e hana,
 ngayi okpála inde ngamanga aní-o,
 abana ngayi ongbengbe okpála ne yi odjedjedje!»

⁶ Pipita-a, ma adje tolo mugito me a ngagama 'ngú ne
 bhiti okpála. Tolo ango-o adú mugito me a ko gili wowo
 'ngu, mugito me kpéke mughálá ngasusula ngae. A adú
 apa me:

«Aleluya! Yi toko Ebhe, Ngámá gba ní-o!

Padhá de, anga a ko Apí 'Kpí.

Aní ngaú maka ngámá.

⁷ Ní kpi ndjili, amba ní dú di bhú djali!

Ní dhөгө aní!

Padhá de, anga nedhinga na anokomia na kuva
 gba Ndili Kandөлө-o akolo,

wala* ani aleke lie aleke.

⁸ U aha bongo inde na kpéke mase pi ani.

Zi bongo ango-o ngasɔ masɔ, zibotɔ bini tété ade.»

(Bongo na kpéke mase bhomɔ-o ngasuno me okpála gba Ebhe-e amene obabadha kulu lio pi ani.)

⁹ Abhomɔ-o, andjelu-o apa mɔma me: «Ye engú inde-e me: «A ko djali pi okpála inde u a'i o bhú anokomia na kɔva gba Ndili Kandøø-o!» Ani atsia apa matá mɔma me: «A bhomɔ-o okukulu eli inde ayie ka Ebhe-o.»

¹⁰ Abhomɔ-o, ma atutu lipuku ma kuto bhú li 'dhu ani ngú nadhøø ani. Engú bini, ani apa mɔma me: «Mo oméne mo-o de. Ma ne bali gba Ebhe maka mɔ. Ma bhadi maka ondaise mɔ inde ngakpokpo kukulu 'ngú inde li Yesu ambamba 'ta e-o. Tutu mangbo lipuku mɔ kala Ebhe.»

Padhá de, anga ngbili 'ngú inde li Yesu akpokpo e ngaha angu pi opolofeta ngae.

Kpála inde adu pí punda na bubu-o aha 'gú ne obhulu yala gba e

¹¹ Pipita-a, ma au kokpí abhulu lie. Abhomɔ-o, punda bini na bubu akoto. Kpála inde adu pépé-e, adu 'li ani me: «Kpála inde ngamene kulu lie pi Ebhe ne bua e bini.» Ani ngakodho 'ngú ngbingbili, ani di ngagu egú bhú ngbili 'ngú . ¹² Djila ani adu nade maka zi djua. Adu di bhú 'ndji ani ne ondata na ngámá bhelé. U aye 'ili bini li kute ani. Ani ambila bha bini 'ta 'ili ango-o ngae.

¹³ Ani adyi koti bini inde u azi e bhú ngute-e li kute e. Adu 'li ani me: «'Li Ebhe.» ¹⁴ Osudha na abhúlá adu akpata ani me u nde a'u'u pí opunda na bububu. U

* 19:7 19:7 Ndili Kandøø ne wala e: Ndili Kandøø-o, a ko Kilisito , wala ani-e, a ko Piga gba Ebhe. Tsia bhú Efe. 5:25, 32.

Apokalipisi 19:15 47 Apokalipisi 19:21

adyidyì obongo na kpéke mase. Bongo ango-o adu bubu, zibotu bini du tété de. ¹⁵ Mbotia inde li 'bhø e adu bebedhe-e adu akoto bhú 'bhø ani. Mbotia ango-o adu ngubula nabhili opiga ne di. Ani aú pí 'ndji uo ne angu e hana. Ani tsia pí vino bhú 'ngbé ngbøngøø na ke 'ngú gba Ebhe Ngámá Apí 'Kpí-o. Ke 'ngú ango-o adu nadula madula.† ¹⁶ U aye 'ili bini li koti gba ani di ne pí 'ku ani. U aye 'ili ango-o me: «'NGBÉ NGÁMÁ GBA ONGBENGBE ONGÁMÁSi, NGÁMÁ GBA ONGÁMÁSi.»

¹⁷ Pipita-a, ma au andjelu bini, alu tu ela. Ani asula kpekpeke pi ndu odhu hana inde adu adholo abhúla tsutsu naali-e me: «Yi go po bhúla yi ngú 'ngbé anokomia gba Ebhe-o! ¹⁸ Yi go zu mbilika ongbengbe ongámási ne ongámási gba osudha di ne osudha. Yi go zu mbilika opunda di ne mbilika osudha inde adhudhuku ne di-o. Yi go zu mbilika okpála, abana i du obhende bhú bali ne obhe bhú bali ade-o, abana i du odjedjedje ne ongbengbengbe.»

¹⁹ Abhomu-o, ma au enu inde i de akoto bhú 'ngbé 'ngu-o, ne ongbengbe ongámási na doto, bhú dabili bini ne osudha gba o me u nde apo bhúla o ngú naha 'gú pi kpála inde adu pí punda ne osudha gba e-o. ²⁰ Abhomu-o, kpála inde adu me ani nde a'u pí punda aholo enu-o bhú dabili bini ne polofeta na eu inde adu nani amene ongamba 'ngú li djila ani-o. Ani adu nani amene ongamba 'ngú bhomu-o ngú nato okpála inde u aye nani tele gba ani-e li kute o bhú ngita, inde adu di adhøø kulu ani-o. Kpála bhomu-o abhike enu-o bhú dabili bini ne polofeta na eu-o bhú dé djua na baluti. Ani abhike uo bhúbhú me u nde mu de. ²¹ Ani atsia abhili osudha gba

† 19:15 19:15 Tsia bhú Ets. 2:9.

uo ne ngise inde adu akoto bhú 'bhø ani-o. Abhomu-o, ndu odhu hana azu mbilika uo. U atsia a'u'u ne di.

20

U agbite Satana ngú kalanga kəthø bini

¹ Pipita-a, ma au andjelu bini ayie abhúlá, ani atsia akə píla doto. A adu sakpa ani ne lifungula na tsu 'du-o. A adu di sakpa ani ne 'ngbé gbindjili na ngbéngbé. ² Ani ago aholo 'ngbé kpulu na didili-o. 'Ngbé kpulu ango-o, a ko Satana inde djabulu. Andjelu ango-o agbite ani ngubula kalanga kəthø bini. ³ Ani abhike ani bhú tsu 'dú. Ani adho bhøbhø nganda ani, ani atsia aye balua pépé. Balua ani aye e adu me, ngubula kalanga kəthø bini-e, ani ngbingi matá 'ndji okpála de. Pipita-a, u atsé mbo 'kpa li ani ngú nedhinga bedi.

⁴ Pipita-a, ma au okiti na ngámá. Okpála inde adulu pépé-e, u aha pi uo angu nakodho 'ngú gba okpála. Ma au di bua okpála bhende u ava nani ngulu o ka u abhuka kukulu 'ngú inde li Yesu ambamba ta e di ne 'li Ebhe lie-o. U dhøgø nani enu-o de. U dhøgø di kulu ani-e de. U ye di nani tele gba ani-e pidi uo, i du di-e li 'kpa uo de. U azuku matá, u atsia au ngámá bhú dabili bini ne Kilisito ngubula kalanga kəthø bini. ⁵ A bhomu-o bhutsibhutsi na bini me Ebhe zuku okpála-o. Okpála bhe koko adjéke ngaiza me kalanga kəthø bini-e le paká, li Ebhe tsia zuku uo. ⁶ A ko djali pi okpála inde azuku bhú ká okpála inde li Ebhe azuku o kalanu bhomu-o. A ko okpála gba Ebhe, la di-e, nakpi na bhisi-e ne angu pí uo ade. U adú odimandø gba Ebhe di ne gba Kilisito. U au ngámá bhú dabili bini ne ani ngubula kalanga kəthø bini.

Satana ati

⁷ Li kalanga k̄ōt̄ō bini-e de ale-e, u gbé Satana bhú tikpu gba e-o. ⁸ Ani tsia nú napite opiga inde agbolo pála doto libhomu. A akunda napa me nayie bhú Gogo nakolo bhú Magogo.* Ani apó bhúla uo ngubula gbele. U tsia dú bhelé nane sike lingo 'ngbé 'ngu mane. ⁹ U abha doto libhomu, u atsia asa bili li omaha Ebhe apo bhúla o lie-o. U atsia asa di gudhu gba okpála li Ebhe akunda o-o. Engú bini, djua ayie abhúlá, atsia ago atsulu uo hana. ¹⁰ Abhomu-o, Ebhe atsia atumba djabulu, kpála inde adu nako napite uo, bhú dé djua na baluti nganda enu-o bhú dabili bini ne polofeta na eu-o. U adú nazu likabhu oo ngbikpi ne sukpe duduma ne duduma.

Lele maka li Ebhe akodho 'ngú na soso-o lie-o

¹¹ Pipita-a, ma au 'ngbé kiti na ngámá bini me kpála bini nde adu pépé. Kiti ango-o adu bubu. Kokpi ne doto akpekpe de ani tsutsu. Kpála tsia u matá uo de. ¹² Abhomu-o, ma au okpála inde amu-o, ongbengbengbe ne odjedjedje, alulu kala kiti na ngámá-o. U abhulu obhuku. U atsia abhulu di bhuku koko, a adu bhuku na mukobho-o. Abhomu-o, Ebhe atsia akodho 'ngú gba okpála inde amu-o nakpata lele kulu gba uo-o, nakpata engú inde u aye e bhú obhuku-o. ¹³ 'Ngbé 'ngu azie okpála inde amu inde adu bhúbhú-o. Kuo ne kuti gba okpála inde amu-o azie di okpála inde adu agba uo-o. Abhomu-o, Ebhe atsia akodho 'ngú gba kpála ne kpála nakpata lele kulu gba e-o. ¹⁴ Abhomu-o, Ebhe atsia atumba kuo bhú dabili bini ne kuti gba okpála inde amu-o bhú dé djua-o. Dé djua bhomu-o, a ko nakpi na bhisi. ¹⁵ Abhomu-o, ndu kpála hana inde u ye 'li e bhú bhuku na mukobho-o de-e, u abhike ani bhú dé djua bhomu-o.

* 20:8 20:8 Gogo ne Magogo: A ko 'ili ngú nasuno obhulu yala gba omatsalaele.

21

Ebhe abhó ndu 'he hana ne toto

¹ Pipita-a, ma au kokpí na mbia ne doto na mbia, anga kokpí na kalanu ne doto na kalanu-o andjia. 'Ngbé 'ngu du matá di-i de. ² Ma atsia au gudhu na bubu-o ngayie abhúlá. Gudhu ango-o, a ko Yelusalema na mbia. Ebhe atima gudhu ango-o ngae. A adu akø kuto me a nde bedhe maka øø inde aleke lie ngú nanu nakø lie ne 'ko e. ³ Ma adje kpála bini ngatobhila kpekpeke li pápá li kiti na ngámá-a adu li e me: «Mbia inde-e dabili nadu gba Ebhe-e bhú ká okpála. Aní adú ne uo, u tsia dú omaha aní. Ebhe ngae makpe adú bhú dabili bini ne uo, aní adú Ebhe gba uo. ⁴ Aní akúo ndu ngula sa kula uo hana, okpála mú matá-a de. Engú na da kuo dú matá-a de, egbá dú di-i de, likabhu dú di-i de, anga doto na kalanu-o nde andjia.»

⁵ Abhomu-o, kpála inde adu pí kiti na ngámá-a atsia apa me: «Mbia inde-e, ma ngabho ndu 'he hana na mbia.» Pipita-a, aní apa muuma me: «Ye 'ngú inde, anga eli ma ngapa e-e, a ko kukulu 'ngú, inde a ayo la di me okpála bhuka e ko.» ⁶ Aní atsia apa matá muuma me: «A amene lie amene! Ngama-a, ma ne Alafa di ne Omega. Ngama-a, ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana. Kpála inde lie ne gumu 'ngu-o, ma ahá engu nandji mandji pí aní padhá bhú kpongu inde ngaha mukobho. ⁷ Kpála inde agbóko egú-o, ma ahá ndu 'he bhomu-o hana pí aní, ma adú ne Ebhe gba aní, aní tsia dú ndili gba ma. ⁸ La pí okpála bhende ngamene siti 'ngú-o, dá uo abhú dé djua na baluti na duduma ne duduma. A bhomu-o nakpi na bhisi. A ko okpála namene ngua siti 'ngú inde: obhulu tsulu, okpála ayala nabhuka, obhulu namene zabhe, obhulu nabhøø

kpála, obambakuya, obhulu kelo, obhulu nayo oebhe na eu, ne obhulu eu.»

Yelusalema na mbia

⁹ Abhomu-o, sika oandjelu mananika inde adu sakpa o ne okópo mananika, inde abedhe ne olikabhu mananika na soso-o ago apa muma me: «Gogo, ma nu suno elo na kava-a pi mu. A ko wala Ndili Kandelo-o .»

¹⁰ Bu Bhobua ago abedhe ma, abhomu-o andjelu-o anu a'o ma pí 'ndjá 'ta. Eta angoo adu ngbéngbé. Ani asuno gudhu na bubu-o muma. Gudhu angoo, a ko Yelusalema li Ebhe atima e ngae-o. A ayie abhúla, a atsia adu aké kuto. ¹¹ Zizi adu asu ka sangu gba Ebhe-o. Zi gudhu angoo adu nasu má ngingingi mugito me a ko teme* na mase. ¹² Aga inde u asa e li kukute-e adu ngbéngbé, di ndjándjá. Bhobho adu tété ndjikpa ne ká bhisi, oandjelu ndjikpa ne ká bhisi atsia adu nalilila. U atsia aye 'li opiga ndjikpa ne ká bhisi na Isalaele-e tété. ¹³ Ne ndu pasu hana bhobho adu tété bata: bata ne ndjangu, bata ne kati, bata li pápá na abebe, bata li pápá na yoyoko. ¹⁴ U ayiki aga bhomu-o pí oteme ndjikpa ne ká bhisi. U atsia aye 'li obhulu titima ndjikpa ne ká bhisi gba Ndili Kandelo-o tété.

¹⁵ Andjelu inde adu apa 'ngú muma-a, adu sakpa ani ne mbamba na olo inde ani adu napima ne e gudhu-o, ne obhobho, di ne aga angoo. ¹⁶ Gudhu angoo adu ne odjedje badha. A aviti bhú 'ndjá ne bhú bá, ne bhú 'ngbé-e bini. Li andjelu-o apima gudhu-o lie ne mbamba gba e-e, mbamba-a ali bhúbhú bhutsibhutsi koto 12† ne ká

* 21:11 21:11 Teme: Bhú eli na giliki-e, u aye me «Teme na djasepe ne kilisitale.» † 21:16 21:16 Mbamba bhutsibhutsi koto 12: Gudhu bhomu-o adu bhú 'ndjá-a masikpe de kilometele koto bhisi ne 'he pépé ndu pasu hana.

bhisi ne ndu pasu hana. ¹⁷ Ani apima di aga-o, mbamba gba ani-e ali bhúbhú bhutsibhutsi koto 144[‡] bhú 'ndjá abhúlá. Ani apima bha maka li okpála apipima 'he lie-o.

¹⁸ U ayiki nani aga ne teme inde u ali e me djasepe. Gudhu-o libhomu adu ngili olo. A atsia adu má ngilili maka tsupa na bubu. ¹⁹ Oteme inde u amene 'dhu aga na gudhu-o ne e, u aye nani tele tété ne ndu djua oteme na mase hana: bhe na bini-e adu teme na djasepe, bhe na bhisi-e adu teme na safile, bhe na bata-a adu teme na kalaseduane, bhe na badha-a adu teme na emelode, ²⁰ bhe na bhuluvue adu teme na saladuane, bhe na madhia adu teme na kolonoline, bhe na mananika adu teme na kilidjolite, bhe na madjina adu teme na belile, bhe na odukpabini-e adu teme na topadje, bhe na ndjikpa-a adu teme na kilidjopaladje, bhe na ndjikpa ne ká bini-e adu teme na yasete, bhe na ndjikpa ne ká bhisi-e adu teme na ametisite. ²¹ Obhoti ndjikpa ne ká bhisi-e adu omayaka ndjikpa ne ká bhisi. U abho nani bhoti bini ne bini li lí mayaka bini má kpikili! 'Ngbé 'hi kpadji na gudhu-o adu nani ngili olo. A atsia adu má ngilili maka tsupa na bubu.

²² Ma u belegu 'ngbé 'ti Ebhe bhú gudhu bhomu-o de, anga Ebhe Ngámá Apí 'Kpí ngae makpe bhú dabili bini ne Ndili Kandole-o ne 'ngbé 'ti Ebhe ango-o ngao. ²³ Gudhu ango-o du ne gumu ela abana di epe ngu naha zi kpí oo de, anga sangu gba Ebhe-e ngasu zi e oo ngae, Ndili Kandole-o la di ne tala ango-o ngae. ²⁴ Opiga na doto adu aduku li zi gudhu ango-o. Ongbengbe ongámási na doto tsia gó di ne tia gba o bhú gudhu ango-o. ²⁵ Obho bhoti na gudhu ango-o adu ndu nedhinga hana bábá, u ní galikpe-e de, anga ekpí bí galikpe oo de. ²⁶ Opiga na

[‡] 21:17 21:17 Mbamba bhútsibhutsi koto 144: A ko masikpe de metele ndjikpa mananika ne ká bhisi.

doto adu nali bhúbhú ne sangu di ne obabadha tia gba o-o. ²⁷ Ehe bini na sisiti lí oo de, abana okpála namene engú inde lí Ebhe ayala e, abana obhulu eu. A alí bha bini oo ne okpála inde u aye 'lí o bhú bhuku na mukobho-o, bhuku gba Ndili Kandole-o.

22

¹ Pipita-a, andjelu-o asuno muma ngade 'ngu inde ngaha mukobho pi okpála-o. Ngade 'ngu ango-o adu má ngilili maka tsupa na bubu. A adu ayie lí bilí lí kiti na ngámá gba Ebhe ne Ndili Kandole-o adu lí e-o. ² Engu ango-o atsia adu akpe lí 'ngbé 'hi kpadji na gudhu na bubu-o. Ne ndu pasu bhisi na ngade 'ngu-o hana adu tété ne ndula inde ngaha mukobho. Ndula ango-o ngali lílí bhutsibhutsi ndjikpa ne ká bhisi bhú kalanga bini. A ngali lílí bhutsibhutsi bini ndu epe bini ne bini hana. Kpákpá-a atsia adu nateteke ngubula nakobho okuo gba opiga.

³ Ohe inde lí Ebhe tú matá pødjø lí e, lí bhú gudhu ango-o de. Kiti na ngámá gba Ebhe ne uo ne Ndili Kandole-o adú bhú gudhu-o. Obalise gba Ebhe-e tsia dú nadhøgø ani. ⁴ U aú bhúla ani, u tsia yé 'lí ani pidi uo. ⁵ Sukpe dú matá-a de, u dú di matá ne gumu zi tala abana zi ela de, anga zi Ebhe Ngámá asú pi uo ngae, u tsia ú ngámá duduma ne duduma.

Nago ka Yesu

⁶ Pipita-a, andjelu-o apa muma me: «Ongú inde ma apa e, a ko kukulu 'ngú inde ayo me okpála bhuka e. Ebhe Ngámá inde ngato 'lí e bhú opolofeta-a , atima andjelu gba e ngú nasuno pi obalise gba e engú inde ayo me akolo mbia inde-o.»

⁷ Yesu apa me: «Gbo 'dje mu, Ma ngago mbia inde! A ko djali pi kpála inde ngalila ongú inde li Ebhe ambamba ta e bhú bhuku inde-o!»

⁸ Ngama Djaa , ma adje ongú bhomu-o ne 'dje ma, ma atsia au di ne djila ma. Pita nadjedje ne nauu-o, ma ati bhú li 'dhu andjelu inde asuno ongú bhomu-o muma-a ngú nadhogò ani. ⁹ Engú bini, ani apa muma me: «Mo oméne mo-o de! Ma ne bali gba Ebhe-e maka mu. Ma bhadi maka ondaise mu inde ngakpokpo kukulu 'ngú inde li Yesu ambamba ta e-o. Ma maka ndu okpála hana inde ngalila engú inde u aye e bhú bhuku inde. A ayo mangbo me mu dhogò Ebhe!»

¹⁰ Pipita-a, andjelu-o apa muma me: «Mo owó ongú inde li Ebhe ambamba ta e bhú bhuku inde-e de, anga nedhinga ngú namene lie ka ongú ango-o akolo masikpe.

¹¹ A ayo me kpála bhende ngamene siti 'ngú-o nu bha nedi ne kalanu, kpála bhende ngamene engú inde li Ebhe ayala e nu bhadi nedi ne kalanu. Kpála bhende ngamene ngbili 'ngú nu bhadi nedi ne kalanu, amba kpála bhende ngamene engú inde nganga li Ebhe-e nu bhadi ne di ne kalanu.» ¹² Yesu apa me: «Gbo 'dje mu, ma ngago mbia inde! Ma ngago sakpa ma ne makalá inde ayo me ma ha e pi kpála ne kpála nakpata lele kulu inde ani amene e-o.

¹³ Ngama-a, ma ne Alafa di ne Omega, a kunda napa me ma ne kpála na kalanu, ma la di ne kpála na soso. Ma ne Kpála inde akpo lita ndu 'ngú hana, ma di ne Kpála inde abú ta ndu 'ngú hana.»

¹⁴ A ko djali pi okpála inde ngavulu obongo gba o-o. Ebhe Ngámá ahá kpadji pi uo me, u li li obhoti na gudhu na bubu-o, amba u zu di lí 'lá inde ngaha mukobho-o.

¹⁵ Engú bini, ndu okpála bhe koko hana, u lí bhú gudhu-o de. Okpála ango-o ngao inde: okpála inde li Ebhe atu

pødjø li o, obhulu kølø, obhulu zabhe, obhulu nabhili okpála, okpála inde ngadhøgø oebhe na eu, di ne ndu okpála hana inde ngakpi ndjili li eu, inde di ngapa eu-o.

¹⁶ «Ngama Yesu-o, ma atima andjelu gba ma-a ngú nago nambamba ta ongú bhomu-o pi yi bhú oDadjua gba Ebhe-o. U azu ma bhú piga gba 'ngbé ngámá Davidi. Ma ne ikupala inde asusu køkpi-o.»

¹⁷ Bu Bhobua ngauo ne ølø na kuva apa me: «Gogo!»

A ayo me kpála inde adje engú inde-e pa di me:
«Gogol!»

A ayo me kpála inde li e ne gumu 'ngu-o gógo.

A ayo me kpála inde li e ne gumu engu inde ngaha mukobho-o sia padhá.

Engú na soso

¹⁸ Ngama Djaa, ma ngagbele 'dje ndu okpála hana inde ngadje ongú inde li Ebhe ambamba ta e bhú bhuku inde-e me, li kpála bini 'o engú koko pépé-e, Ebhe 'ó bhadi ndu olíkabhu hana inde u aye e bhú bhuku inde-e pí ani!

¹⁹ Li kpála bini 'e la di ehe bini bhú ká ongú inde li Ebhe ambamba ta e bhú bhuku inde-e, Ebhe 'é makalá gba ani inde u akpokpo 'ngú e bhú bhuku ango-o. Makalá ango-o, a ko lí 'lá inde ngaha mukobho pi okpála, a ko la di nali bhú gudhu na bubu-o.

²⁰ Kpála inde alu pí ndu 'ngú inde-e hana apa me a ko kukulu 'ngú-o apa me: «A moko, ma ngago mbia inde!»

Ngama Djaa, ma atsia apa me: «A adu moko! Gogo, Ngámá Yesu.»

²¹ A ayo me Ngámá Yesu suno bádha bhú 'bu gba e pi ndu yi hana.

Gandja na Mbia

Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c